

# Vaaru poia to Yesu Krisi tau Markus iboode Mak—Mark

*Neer rughuzaan̄a Yoan igharaat eez pa Yesu Krisi  
(Mt 3:1-12; Lu 3:1-18; Yo 1:19-28)*

<sup>1-2</sup> Ene vaaru poia to Yesu Krisi, i Maaron Naatu. Saveēna tau imuun̄, ene vene: Uraat tooni iburig itaghon Maaron aliin̄a tau propet Isaia ivotia ve tiboode na. Isaav ighe:

“Uloon̄. Yau pale nambaan̄ besoon̄a tsiau ee imuun̄ payo.

I pale ivotia aliin̄ag pa tamtamon ve igharaat eez payo. \*

<sup>3</sup> Neer ee iboboob izi nugh nginaan̄a ighe: ‘Agharaat eez pa Neer Tiina!

Apadudun̄ai eez pani le iduduun̄.’ ” \*

<sup>4</sup> Saveēn̄ tane ighur anoon̄a izāa to neer rughuzaan̄a Yoan. Pasaa, i ila ivot nugh nginaan̄a, ve ivovotia Maaron aliin̄a pa tamtamon ighe tipul ngar toozi sasaghati ileple, ve titoor ngar toozi imuul ila pa Maaron ve tigham yaa. Leso Maaron ireu sosor toozi. \*

<sup>5</sup> Eval tiina to taan sirivu to Yudea, yes̄na Yerusalem̄a tisov timeke tilala tooni izi yaa Yordan, ve tivovotia sosor toozi ila tooni, ve i irurughuuz zi ta sewe.

---

\* **1:1-2:** Mal 3:1; Mt 11:10; Lu 7:27      \* **1:3:** Is 57:14; Yo 1:23

\* **1:4:** Mban̄ 13:24, 19:4

<sup>6</sup> Yoan inonogh ghi pa uuli tau tigharaata pa kamel ooro, ve ipuus n̄gaali pa puus tau tigharaata pa n̄gai uuli. \*

Ve ighanghan siis, ve ighunghun tok suuru. \*

<sup>7</sup> I ivovotia saveen pa tamtamon tauvene ighe: “N̄eer ee aat ilam murei payau. I tapiri tiina. Iliiv ghau kat. Uraat sorok imin naput agheg pani ve napool waar to zuzuun̄a to aaghe, ene paam, yau poiag irau to naghama pani ne mako. \*

<sup>8</sup> Yau narughuuz gham pa yaa. Eemon i pale igham Avuvu Patabuyaana payam.” \*

*Yesu igham yaa*

*(Mt 3:13-17; Lu 3:21-22)*

<sup>9</sup> Saawe tana, Yesu ipul nugh Nasaret tau ighen taan sirivu to Galilaia, ve ilaagh ila ivot to Yoan izi yaa Yordan, ve Yoan irughuuz ta sewe. <sup>10</sup> Yesu ipul yaa ve izaa, ve saawe duduun̄ tana, maata izala le ighita sambam ikaak, ve Maaron Avuvu izilam imin mbuun, ve izala paavo.

<sup>11</sup> Ra saveen sambam ve izilam ighe: “Yau natug yo. Yau lolog ighen tsio, ve yo ugham ghau lolog poia kat.” \*

*Sadan itoov Yesu*

*(Mt 4:1-11; Lu 4:1-13)*

<sup>12</sup> Yesu igham yaa le isov, ve rekia mon Maaron Avuvu ipaburighini gha ipul yaa Yordan, ve ila ivot nugh n̄ginaana. <sup>13</sup> I ileep ta sewe tomania gabua

---

\* **1:6:** Yoan inonogh ghi imin muun̄ propet Iliia inonogh ghi. N̄gar tooni tane, ene imin ilaal pani ighe i pale igham uraat siriv imin Iliia. \* **1:6:** 2King 1:8 \* **1:7:** Mban̄ 13:25 \* **1:8:** Mban̄ 2:4, 11:16 \* **1:11:** Mbo 2:7; Is 42:1; Mt 12:18; Mk 9:7

to su irau mboŋ tamoot ru. Saawe tana, Sadan itovtoova. Eemon yes anjela tilepleep tomania ve tiuluule. † \*

*Yesu ipaburigin uraat tooni izi Galilaia  
(Mt 4:12-17; Lu 4:14-15)*

<sup>14</sup> Yoan ighamgham uraat tooni, le tikisi ve tighuru ilonŋ ila ruum to yavyavuunŋ. Ra Yesu ila ivot taan sirivu to Galilaia muul, ve ipaburigin uraat tooni to votiaanŋ vaaru poia to Maaron. <sup>15</sup> I isavsaav pa tamtamon ighe: “Aloonŋ! Saawe to Maaron itotoi pooz tooni ivot ighazonŋ, ene ilam igharau wa. Apul nŋar tsiam sasaghati ileple, atoor nŋar tsiam imuul ila pa Maaron, ve aghur ila vaaru poia!” \*

*Yesu ipoi tamtamon paanŋ timin mbiwa tooni  
(Mt 4:18-22; Lu 5:1-11)*

<sup>16</sup> Saawe ee, Yesu ilaghlaagh taghon nari to yaa naliu Galilaia, ve ighita zeran ru to ghamuunŋ iigh tiwaswaas. Ee, eeza Simon, ve ite eeza Andreas. I Simon taazi. <sup>17</sup> Yesu isaav ila pazi ighe: “Ai, yamru alam ataghton ghau. Leso natotoi eez to ghamuunŋ tamtamon payam.” <sup>18</sup> Reikia mon yesuru tipul puugh toozi izi ileple, ve titaghton Yesu gha yesŋa tila.

<sup>19</sup> Tilaghlaagh tila rig, ve Yesu ighita Zebedi natŋa ru, Yakobus ve Yoan, tilepleep izala waanŋ ve tiyaim puugh toozi. <sup>20</sup> Yesu reikia mon isaav ila pazi ighe tilam titagthoni. Tauvene yesuru

---

† **1:13:** Yesu ileep izi nugh nŋinaaŋa ve Neer Saghati itovtoova imin muunŋ Adam ileep izi uum Eden ve Sadan itoova. Eemon Yesu itap ve igham nŋar saghati eta mako. \* **1:13:** Gnp 2:19–3:7; Mbo 91:11+; 1Kor 15:47 \* **1:15:** Mt 3:2; Ga 4:4

paam tipul tamazi tomania uraata tooni tileep izala waan, ve tila titaghon Yesu gha yesnja tila.

*Yesu iziir avuvu saghati pa neer ee  
(Lu 4:31-37)*

<sup>21</sup> Yesu tomania mbiwa tooni tila tivot nugh Kapernaum, ve tileep ta sewe le umbom patabuyaanj ivot. Ra Yesu ilonj ila rumei toozi, ve ipaghazonjai zi pa Maaron aliinja. <sup>22</sup> Yes tiloonj saveenj tooni le tirur pa ngar tooni. Pasaa, i ipaduduunj tamtamon imin zeran ngara siriv to tutuunj mako. Saveenj tooni, toman tapiri. Ve isavsaav imin tamtamon tau i le eeza pa uraat tauvene. \*

<sup>23</sup> Saawe tana, neer ee ilepleep tomani zi ila rumei loolo. I, avuvu saghati izeeva. Tauvene iboob aliinja tiina ighe: <sup>24</sup> “Aii, Yesu to Nasaret, ulam sene pasaa? Yei nimbaanj payo? Ma ulam ughe uvaghamun ghei? Yau nawatagh ghom wa. Yo neer patabuyaanj to Maaron.” \*

<sup>25</sup> Eemon Yesu iyaoni ighe: “Ai, yo uneneenj. Upuli ve ughau ula!” <sup>26</sup> I isaav tauvene, ve avuvu saghati ivatoki neer tawe, iyak saghat, ve ipuli ve ila. \*

<sup>27</sup> Yes tau tighita gabua ngereeta tana, tisov tirur pa Maaron tapiri, ve tivasavo zi tigde: “Wai, ene gabua mindai? Ene ngar paaghu ee. Neer tane, i le eeza ve tapiri. Aghita. Avuvu sasaghatizi paam tileep ila i saamba. Pasaa, i isaav ariaanj pazi, ve tilonloonj aliinja gha tighaughau tila.” <sup>28</sup> Puughu

---

\* **1:22:** Mt 7:28+ \* **1:24:** Mt 8:29; Mk 15:39; Yems 2:19 \* **1:26:** Mk 9:26

tane ta Yesu vaaru ilaan rekia mon le irau taan sirivu to Galilaia.

*Yesu igharaat moroghoonj to Petrus rauliva  
(Mt 8:14-15; Lu 4:38-39)*

<sup>29-30</sup> Yesu ipul rumei tana, ve yesnja Yakobus gha Yoan malmalizi tila pa Petrus yesuru Andreas ruum toozi. Tilonj tila ruum loolo, ve tipaes pa Yesu tighe Simon rauliva imoroonj le tiini iyees gha ighengheen we. <sup>31</sup> Tauvene Yesu ila ikis olman tinazi niima, ve iiti iburig, le moroghoonj tooni isov. Ra olman tinazi ila igharaat lezi aniinj.

*Yesu igharaat moroghoonja katini  
(Mt 8:16-17; Lu 4:40-41)*

<sup>32</sup> Tilepleep le ravrav izi gha aaz izila, ra tamtamon tiyauur zetaznja tisov tau timoroonj, ma avuvu sasaghati tizeev zi na tila to Yesu, leso iuul zi. <sup>33</sup> Nugh tawe tamtamona tisov tila tirou izi ruum tau Yesu ileep pani na naagho.

<sup>34</sup> Yesu igharaat tamtamon katini pa moroghoonj toozi maata maata, ve iziir avuvu sasaghati naol pazi paam. Avuvu sasaghati tawe tiwataghi wa. Tauvene i ingalsekin zi ighe tisavia saveenj eta sov. \*

*Yesu igham uraat izi nugh siriv to Galilaia  
(Lu 4:42-44)*

<sup>35</sup> Mbonjoozo, ndoroome geeg, ve Yesu iburig gha ipul ruum, ve ilaagh ila pa nugh nginaanja ee. Ra zigani ileep ta sewe ve isunj. \*

---

\* **1:34:** Mk 1:24, 3:11+      \* **1:35:** Mbo 5:3; Mt 14:23; Mk 6:46

<sup>36</sup> Eemon Simon tomania zeetņa siriv tila tiilo.

<sup>37</sup> Tila tindeenņa, ve tipaes pani tighe: “Eval tiina tiliil ghom we!”

<sup>38</sup> Yesu iyol alinjazi ighe: “Iit aat tala pa nugh siriv tau tatangan ne. Leso navotia saveeņ pazi paam. Pasaa, yau nalam pa uraat tane.” <sup>39</sup> Tauta Yesu ilaagh irau nugh nugh to Galilaia, ve ivovotia Maaron aliinņa ilonj ila rumei toozi, ve izirziir avuvu sasaghati gha tighaughau pa tamtamon.

*Yesu igharaat ñeer ee tau mbotmboot kolekole ighamu*

*(Mt 8:1-4; Lu 5:12-16)*

<sup>40</sup> ñeer ee, kolekole ighamu. †

I injarui Yesu ila, iput aaghe izi naagho, ve itan raraini ighe: “Isaav ighe lolom pa uleeņ ghau, yo irau ugharaat ghau tinig poia ve ugham ghau nangalaanj ila Maaron maata.”

<sup>41</sup> Yesu loolo isaghatini, tauvene niima ila ikisi, ve isaav pani ighe: “Poia, yau aat nauul ghom. Aiyo, tinim poia ve unġalaanj!” <sup>42</sup> I isaav tauvene, ve rekia mon kolekole ighau pa ñeer tana le tiini poia. <sup>43-44</sup> Ra Yesu imbaanņo ila ve isaav ariiaanj pani ighe: “Uloonj. Aazne, tinim poia wa. Eemon usavia gabua tane vaaru pa tamtamon eta sov. Malmalim ula, ve utotoi taum pa ñeer eta to watoonjrau, ve ugham watoonjrau pa Maaron itaghon tutuunj tau Mose isavia na. Leso upaghazonjai

---

† **1:40:** Isaav ighe kolekole igham tamtamon eta, ene patanani tiina kat. Moroghoonj tooni ipoona pa zeetņa ve Maaron paam. I irau igharau tamtamon eta mako, ve irau ilonj ila Rumei Tiina pa sunjuunj mako.

taum pa tamtamon, ve tiwatagh tighhe tinim poia ve unġalaan ġila Maaron maata wa.” \*

<sup>45</sup> Eemon njeer tana itaghon Yesu aliiġa mako. I ġila ve ipaesia gabua tau ivot pani na vaaru pa eval tiina. Tauvene Yesu irau ġilaagh ġila tamtamon matazi muul mako, ve ġilon ġila nugh eta mako. Zi-gani ġilepleep ġizi nugh nġinaanġa. Eemon tamtamon to nugh nugh tilala tooni.

## 2

*Yesu ġigharaat njeer narape ee ve ireu sosor tooni  
(Mt 9:1-8; Lu 5:17-26)*

<sup>1</sup> Mboġ siriv ġilam ġila, ra Yesu ġimuul ġila pa Kaper-naum, nugh tau i ġilepleep pani na. Tamtamon tilooġ Yesu vaaru tighhe i ġimuul ġila ġileep ġizi ruum tooni, <sup>2-3</sup> tauvene eval tiina tila ve tipavon ruum le ivon kat. Ataman puughu paam, tipoona le sooso mako. Yesu ivovotia Maaron aliiġa pazi, ve zeran paan tibaad njeer narape ee tilam tighhe Yesu ġiuule. Njeer tawe, aaghe ġimaat. Irau ġilaagh mako. <sup>4</sup> Zeran paan tana titoova to tilooġ tila tigharau Yesu. Eemon tirao mako. Pasaa, eval tiina tipoon zi. Tauvene tigham narape tana, ve titaghon ndeet tizala pa ruum paavo. Ra tipas atov siriv ġighau, ve titughu tomania moogh tau i ġigheen ġizala na ġinarui Yesu ġizila, le ġigheen ġizi naagho. <sup>5</sup> Yesu ġighita zeran tana ġhuruuġ ġila toozi ġiyaryaan kat. Tauvene ġisaav pa narape tana ġighe: “Tazig, sosor tsio, yau nareua wa.” \*

<sup>6</sup> Zeran nġara siriv to tutuuġ tileep tomani zi ta sewe paam. Yes tilooġ Yesu aliiġa ziiiri rig tane, ve

---

\* **1:43-44:** Wkp 14:1+      \* **2:5:** Lu 7:48

tigham n̄gar naol ila lolozi tigde: <sup>7</sup> “Wai, puughu mindai ta n̄eer tane isaav tauvene? I ivelegh Maaron! Tamtamon eta irau ireu sosor mako. Maaron mon, o ireu sosor.” \*

<sup>8</sup> Yesu rekia mon ighilaal n̄gar toozi ila loolo. Tauvene ighason zi ighe: “Puughu mindai ta yam agham n̄gar naol ila lolomim? <sup>9</sup> Saa saveen ta raurauai payau to nasavia, leso yam aghur ila? Nasaav pa narape tane naghe: ‘Sosor tsio, yau nareua wa’, ma naghe: ‘Yo uburig, ugham moogh tsio, ve ulaagh?’ <sup>10</sup> Eemon yau naghe yam awatagh kat tauvene: Tamtamon Naatu, i eeza pa rewaan sosor to tamtamon izi taan.” Ra isaav pa narape tana ighe: <sup>11</sup> “Yau nasaav payo: Uburig, ugham moogh tsio, ve umuul ula pa ruum.” \*

<sup>12</sup> I isaav tauvene, ve eval tiina tawe tisov timarar narape tana, ve rekia mon i iburig iyooz, igham moogh tooni, ve ivot gha ila. Yes tighita gabua n̄gereeta tana, ve tisov tirur pa Maaron tapiri, ve tipait eeza pa tapiri ve poia tooni tigde: “Wai, ta muun̄ ve ilam, iit taghita gabua tauvene pai eta soone.” \*

*Yesu ipoi Levi imin mbiwa tooni*

*(Mt 9:9-13; Lu 5:27-32)*

<sup>13</sup> Yesu ipul nugh tawe, ve indari izila nari to yaa Galilaia muul. Eval tiina tila tooni, ve i ipaghazon̄ai zi pa Maaron aliina. <sup>14</sup> Ra ilaagh muul ila, le ighita n̄eer ee to yaun̄ takes ilepleep ila niia to uraat, eeza Levi. I Alpeus naatu. Yesu isaav

---

\* **2:7:** Mbo 32:5; Is 43:25; 1Yo 1:9

\* **2:11:** Yo 5:8; Mban̄ 3:6

\* **2:12:** Mt 9:33



pani ighe: “Yo ulam utaghon ghau.” Tauvene Levi iburig, ve itagho ni gha yesuru tila.

<sup>15</sup> Murei ra, Levi igham ghanghaniin izi ruum tooni. Yesu tomania mbiwa tooni tila tileep tomani zi, ve yesna tilup zi pa ghanghaniin. Saawe tana, Levi zeetna katini to yaun takes, tomania tamtamon naol to ghamuun sotor tilam paam ve yesna tilup zi pa ghanghaniin. Pasaa, tamtamon tauvene, katini titaghon Yesu. <sup>16</sup> Zeran tutuuna siriv tau lezi ngar tintiina pa tutuun na, tighita Yesu tomania zeran to ghamuun sotor ve yes to yaun takes tilup zi pa ghanghaniin, ve tighason mbiwa to Yesu tigde: “Wai, mindai ta tiina tsiam yesna zeran to yaun takes ve yes to ghamuun sotor tilup zi pa ghanghaniin?” \*

<sup>17</sup> Yesu iloon saveen toozi, ve isaav pazi ighe: “Yes tau tinizi poia na, dokta le uraat pazi mako. Yes moroghoona mon, o i le uraat pazi. Yau tauvene paam. Nalam pa poin tamtamon dudunazi mako. Nalam to napoi yes to ghamuun sotor.”

*Ghasoniin pa ngar to ngunuun tauun pa ghaniin aniin*

*(Mt 9:14-15; Lu 5:33-35)*

<sup>18</sup> Neer rughuzaana Yoan zineera ve zeran tutuuna zinerazi, saawe naol tingun tauzi pa ghaniin aniin itaghon sunuun ngara. Tauvene saawe ee, zeran siriv tinjarui Yesu tila, ve tighasoni tigde: “Yoan zineera ve zeran tutuuna zinerazi, saawe naol, tingun tauzi pa ghaniin aniin. Pu-ughu mindai ta mbiwa tsio titaghon ngar tauvene mako?”

---

\* **2:16:** Mt 11:19; Lu 15:1+

19 Yesu iyol ghasoniin toozi tauvene: “Isaav ighe ñeer eta ivai paaghu ve yesña zeetña tilup zi pa ghanghaniin to vain tooni, pale zeetña loloji ipatañan ve tinjun tauzi pa ghaniin aniin? Mako. Pa etazi ite tau ivai paaghu na ilepleep tomani zi. 20 Eemon murei, saawe eta pale ivot, o tikis vain paaghu tana, ve tighamu ipul zeetña gha ila. Saawe tana, zeetña pale loloji ipatañan, ve tinjun tauzi pa ghaniin aniin.”

*Eez munğaana to sunjuun irau ilup tomania eez paaghu to Yesu mako  
(Mt 9:16-17; Lu 5:36-39)*

21 Yesu isavia saveen palelaan ite ighe: “Uuli munğaana tau perekia na, ene irau tisai uuli paaghu rigta izala paavo to ipoona ne mako. Pasaa, uuli paaghu tawe pale ighoghoov uuli munğaana tana, mako ivaputu ghi le isaghat kat. 22 Vaen tauvene paam. Irau tilin vaen paaghu izila paatu munğaana tau tigharaata pa mekmek uuli ne mako. Pasaa, vaen paaghu pale ipasaria paatu munğaana le diñia ve perekia. Mako vaen imalin, ve paatu paam isaghat. Tauvene vaen paaghu izila patuzi paghpaaghu, o poia.” \*

*Tamtamon Naatu injin umbom patabuyaan  
(Mt 12:1-8; Lu 6:1-5)*

23 Umbom patabuyaan ee, Yesu tomania mbiwa tooni tilaghaagh ila uum to wit loloji, ve mbiwa tooni tinjoor wit anoonja siriv gha tighan. \*

---

\* 2:22: Mbanj 15:1-29; Ro 10:4; Hib 8:13      \* 2:23: Lo 23:25

24 Tauvene zeran tutuuŋa siriv tau tileep tigharau zi na, tighason Yesu tighe: “Ughita! Pu-ughu mindai ta mbiwa tsio tigham ŋgar tana? Aazne, ene saawe to uraat mako. Ene umbom patabuyaŋ to Maaron. Ŋgar tau tighamu ne, ene isapir pa tutuuŋ to umbom patabuyaŋ.” \*

25-26 Yesu isaav pazi ighe: “Sinaiŋ tau isavia saawe tau kinik David yesŋa zeetŋa siriv timbool pa aniiŋ ve pitool zi na, yam awaato rigta, ma mako? Sinaiŋ tana isaav tauvene: Saawe tau Abiata i daaba to watoonrau, David ilonŋ ila balbaal patabuyaŋ to Maaron, ve igham mberet patabuyaŋ tau tighuru ila Maaron naagho na. Mberet tawe le ŋgalsekiina tauvene: Tamtamon sorok irau tighani mako. Yes zeran to watoonrau mon, o tighani. Eemon David igham mberet tana gha ighani, ve irei sirivu pa ziŋeera gha tighan paam.” \*

27 Ra Yesu iparwai saveeŋ tooni ighe: “Maaron ighur umbom patabuyaŋ to iuul tamtamon. Ighur tamtamon to timin besoonŋa pa umbom patabuyaŋ mako.” \*

28 Tauvene Tamtamon Naatu, i Tiina tau iŋgin umbom patabuyaŋ.” \*

### 3

*Yesu igharaat ŋeer ee tau niima imaat*  
(Mt 12:9-14; Lu 6:6-11)

<sup>1</sup> Tileep le umbom patabuyaŋ ite ivot, ra Yesu ilonŋ ila rumei ee. Ve ŋeer ee ilepleep tomani

\* 2:24: Igham 20:10, 34:21      \* 2:25-26: Wkp 24:5+; 1Sam 21:4+

\* 2:27: Igham 23:12      \* 2:28: Kol 2:16-17

zi. I niima ee imaat. <sup>2</sup> Zeran tutuuᅇa siriv tilepleep tomani zi paam. Yes tigde tipayooz Yesu pa savsaveeᅇ. Tauvene timarari tigde tighita: Pale igharaat moroghoonᅇa eta ila saawe to umbom patabuyaᅇaᅇ, ma mako? <sup>3</sup> Yesu isaav pa ᅇeer tau niima imaat na ighe: “Ulam uyooz izi sene.”

<sup>4</sup> Ra ighason zeran tutuuᅇa tawe ighe: “Laak, ᅇgar sindei tau yam aghita aghe iduduᅇaᅇ pa tu-tuuᅇa to Maaron? Tauul tamtamon ve tagham poghani zi pa saawe to umbom patabuyaᅇaᅇ, ma tagham saghatin zi? Tagham mulin zi pa patanani toozi, ma tarav zi timaat?” Yesu isavia saveeᅇ tane le tineneeᅇ mon. Irau tiyol saveeᅇ tooni mako. \*

<sup>5</sup> Tauvene Yesu maata ila pazi toman aatyavyav. Pasaa, ᅇgar toozi iyaryaᅇaᅇ kat, ve lolozi isaghatin ᅇeer tana rigta mako. Eemon lolo ipatanan pazi paam. Ra isaav pa ᅇeer tau niima isaghat na ighe: “Uyoot nimam iduduᅇaᅇ.” Tauvene ᅇeer tana iyoot niima le niima poia muul. <sup>6</sup> Tauta zeran tutuuᅇa tau tileep tomani zi na, tiburig tivot tila muuri, ve yesᅇa zeran siriv tau tipakpaak Erod pa ᅇgar tooni na, tilup zi ve tiil eez pa ravuuᅇaᅇ Yesu imaat. \*

### *Eval tiina titagħon Yesu*

*(Mt 4:24-25, 12:15-16; Lu 6:17-19)*

<sup>7-8</sup> Yesu tomania mbiwa tooni tipul nugh tawe, ve tizila muul pa yaa naliu Galilaia. Ve eval tiina kat to Galilaia titagħon zi gha yesᅇa tila. Ve yes mon mako. Tamtamon katini to Yudea, Yerusalem, ve Idumea, tomania tamtamon naol to nugh siriv tau tighēen ila pa yaa Yordan ziige ite na tila tomani zi. Ve taan sirivu to nugh Tiro

\* **3:4:** Lu 14:3    \* **3:6:** Mt 22:15+; Yo 5:16

ve Sidon tamtamona paam, tilooŋ Yesu vaaru pa gabua naol tau i ighamgham zi na, tauvene tisov tila tigde tighita. <sup>9</sup> Eval tiina tila tilivutin Yesu. Tauvene i isaav pa mbiwa tooni ighe tigham waan eta ilam isaan pan. Ighe tamtamon tigiŋi, o iza waan ve ila ipot soghan. <sup>10</sup> Pasaa, Yesu igharaat moroghoonja katini gha tinizi poia wa. Tauvene tamtamon tisov tau timoroon na, tiva-giriŋi zi tigde le titutu rigta.

<sup>11</sup> Ve yes tau avuvu sasaghati tizeev zi na, saawe isov tau tighita Yesu, titaptap tizi Yesu aaghe pu-ughu, ve tiboboob aliŋazi tiina tigde: “Yo Maaron Naatu!” \*

<sup>12</sup> Eemon Yesu iyaon zi, ve iŋgalsekin zi ariaan ighe tivotia eeza ighazoon sov.

*Yesu ighur tamtamon saŋavul ve ru timin mbaŋoonja tooni*

*(Mt 10:1-4; Lu 6:12-16)*

<sup>13</sup> Murei ra, Yesu izala pa loloz ee, ve ipoi tamtamon siriv tau i loolo pazi na, tilam tooni. <sup>14-15</sup> Ve ighur tamtamon saŋavul ve ru timin mbiwa tooni. Leso tileep tomania, ve murei pale imbaan zi tila pa votiaan vaaru poia. Ve irei tapiri irau zi, ve ighur avuvu sasaghati tisov tileep ila sambazi. Leso tiziir zi tighau.

<sup>16</sup> Zeran saŋavul ve ru tawe, ezazi tauvene: Simon (i, Yesu iwaat eeza ite ighe Petrus), <sup>17</sup> ve Zebedi natja ru, Yakobus gha taazi Yoan. (Zeran ru tane, Yesu iwaat zi ighe ‘Boanerges.’ Ezazi tane, puughu tauvene: ‘Lalaav natja.’) \*

---

\* **3:11:** Mk 1:24, 34; Lu 4:41; Mbaŋ 19:15      \* **3:17:** Lu 9:54

18 Ve Andreas, Pilip, Patoromai, Matayu, Tomas, Yakobus ite tau Alpai naatu na, Tadeus, Simon ite tau iyooz tomania yes Selot, \*

19 ve Yudas Iskariot tau murei ighur Yesu ila koiņa nimazi.

*Yesu koiņa tighe i igham uraat toman Sadan tapiri*

*(Mt 12:22-32; Lu 11:14-23, 12:10)*

20 Yesu tomania mbiwa tooni timuul tila pa ruum, ve eval tiina tilam tilivut zi muul. Tauvene lezi saawe eta to ghaniin mako. \*

21 Yesu ziiri waaro tooni siriv tiloon vaaru pa gabua naol tau i ighamgham zi na, ve tila tighe tik-isi ve tighamu tila. Pasaa, tighe i daaba ikaukau. \*

22 Zeran ngara siriv to tutuun tileep Yerusalem tilam, ve tingal saveen pani tighe: “Aa, ewe Belsebul tau daaba to avuvu sasaghati na izeeva ve ipaloti. Tauta i le tapiri to iziir avuvu sasaghati tighau.” \*

23 Tauvene Yesu ipoi zi tilam, ve isavia saveen palelaan tane pazi ighe: “Mindai, pale Sadan ighur koi pa tauu zeetņa ve iziir zi tighau? Mako.

24 Isaav ighe kinik eta tomania tamtamon tooni tivaghuru koi pa tauzi ve tivalagh zi tileep lez lez, ene irau tiyooz ariaan mako. 25 Ve ruum paam. Isaav ighe tamtamona tivaghuru koi pa tauzi ve tivalagh zi tileep lez lez, ene irau tiyooz ariaan mako. 26 Sadan tauvene paam. Isaav ighe iburig ve igham malmal pa tauu zeetņa, ma tamtamon

---

\* **3:18:** Selot, ene lupuun ee to yes Yuda tau tighe tiziir gavman to Rom tighau. \* **3:20:** Mk 6:31 \* **3:21:** Yo 7:5, 10:20 \* **3:22:** Mt 9:34

tooni tivaghuru koi pa tauzi, ene irau iyooz ariaan muul mako. Tapiri ighe isov.

<sup>27</sup> “Tamtamon eta irau ireu ruum to neer ariaaᅇa eta, ve ilonᅇ ila iyau sorokin gabua tooni ne mako. I aat itatan neer ariaaᅇa tana tapiri ve ikauu pa ravraav le isov, o iyauur gabua naol isov tau tighen ilonᅇ ila ruum tooni loolo. \*

<sup>28</sup> Onoon kat yau nasaav payam: Sosor isov to tamtamon, ve saveeᅇ sasaghati naol isov tau tisiki pa Maaron, ene Maaron irau ireua pazi. <sup>29</sup> Eemon isaav ighe tamtamon eta isik saveeᅇ saghati inarui Avuvu Patabuyaᅇaᅇ tomania uraat tooni, ene sosor tauvene, Maaron irau ireua mako. Pale igheen taghon taghon gha ila.” \*

<sup>30</sup> Yesu isavia saveeᅇ naol tana pazi pasaa, yes tige avuvu saghati izeeva.

*Yesu tiina ve tazᅇa*  
(Mt 12:46-50; Lu 8:19-21)

<sup>31</sup> Saawe tana, Yesu tiina tomania tazᅇa tilam tivot. Yes tiyooz muuri, ve timbaᅇ pa Yesu tige ivot ila toozi. <sup>32</sup> Saawe tana, eval tiina tirou livutin Yesu. Yes tisaav pani tige: “Ou, tinam tomania tazimᅇa tilam tiyozyoos muuri we. Tige tight ghom.”

<sup>33</sup> Yesu iyol alinᅇazi ighe: “Tinaᅇ sei, ve tazignᅇa savunugha?” <sup>34</sup> Ra maata ila pa eval tiina tau tilivuti na, ve isaav pazi ighe: “Ene yau tinaᅇa ve tazignᅇa. <sup>35</sup> Pa sei tau ighe itaghon Maaron loolo, ene imin yau tazig, livug, ve tinaᅇ.” \*

---

\* **3:27:** Kol 2:15; 1Yo 3:8, 4:4; Syg 20:2      \* **3:29:** Mt 12:31+; Lu 12:10; Hib 10:26+      \* **3:35:** Yo 15:14; Ro 8:29; Hib 2:11+

## 4

### *Saveen palelaan to suruvaan uuv (Mt 13:1-9; Lu 8:4-8)*

<sup>1</sup> Yesu ila ivot yaa naliu ziige, ve ipaburigin uraat tooni muul to padudunjaan tamtamon pa Maaron aliinja. Saawe tana, eval tiina kat tila tilivuti tigde tiloon saveen tooni. Tauvene i izaa waan ee, ve tiparuuze ivot ila rig pa nari. Ra mboole izi, ve ivotia Maaron aliinja pazi. Eval tiina tawe tileep izi nari ve tighurghur taliñazi pa saveen tooni. <sup>2</sup> Yesu ipaghazonjai zi pa gabua naol ila saveen palelaan. I isaav pazi ighe:

<sup>3</sup> “Aloon. Pai ee, ñeer ee igham wit uuve, ve ila uum tooni ighe isuruuv zi. <sup>4</sup> Saawe tau isusuruuv uuv tawe, siriv timburur tizi eez. Tauvene man tiroov tila ve tighan suvinia. <sup>5</sup> Ve siriv timburur izi nugh tau mbonjar tiina igheen siinja, ve taan ñgiira mon igheen izala paavo. Tauvene rekia mon titum tizaa. <sup>6</sup> Eemon saawe tau aaz ighaaz ve taan ituntun, wit tawe rauazi timalai ve timatmaat. Pasaa, wariazi tizila geeg mako. <sup>7</sup> Ve uuv siriv timburur ila waar tuatua loloji. Tauvene waar tawe titum tomania wit tizaa, ve tinduruv zi le anonjazi mako.

<sup>8</sup> “Eemon uuv siriv titap tizala taan poia. Tauvene tipaar tizaa le titum poi, ve anonjazi katini. Siriv anonjazi irau tamoot ee sanjavul (30), siriv anonjazi irau tamoot tol (60), ve siriv anonjazi irau ndinndin ee (100).”

<sup>9</sup> Yesu isavia saveen palelaan tane le isov, ra ipariaanja ighe: “Tamtamon tau ighe le taliinja, i aat iloon saveen tane, ve igham ñgar pani poi!”



*Puughu tau Yesu isavsaav ila saveeņ palelaaņ  
(Mt 13:10-17; Lu 8:9-10)*

<sup>10</sup> Eval tiina tana tipul zi ve tila, ve murei ra, Yesu tomania mbiwa tooni saņavul ve ru ve zeran siriv, yes mon tileep. Yes tighasoni pa saveeņ palelaaņ tooni puughu, <sup>11</sup> ve Yesu isaav pazi ighe: “Pooz to Maaron, ene ņgara yonġaanġa. Eemon yam, Maaron igham poghani gham, ve ipaghazonġai ņgar tana payam. Ve yes tau tileep ila pooz tooni loolo mako na, tilonġoon mos ila saveeņ palelaaņ mon. [Pasaa, loloz i vool wa.]

<sup>12</sup> Tauta aat matazi tighitghita gabua, eemon irau tighilaal puughu mako.

Ve talinġazi tilonġoon saveeņ, eemon irau tigham ņgar pani mako.

Ve imin ta tighilaal gabua puughu ve tigham ņgar pani, kanaan titoor ņgar toozi, ve Maaron ireu sosor toozi.” \*

*Saveeņ palelaaņ to suruvaanġ uuv puughu  
(Mt 13:18-23; Lu 8:11-15)*

<sup>13</sup> Yesu isaav pazi muul: “Isaav ighe aghazoon pa saveeņ palelaaņ tane puughu mako, ene pale awatagh saveeņ palelaaņ siriv pughuzi mindai?

<sup>14</sup> Wit uuve tau ņeer tana isuruuv zi, ene iza to Maaron saveeņ tooni. \*

<sup>15</sup> “Uuv siriv tau timburur tizi eez, ene iza to tamtamon tau tiloon Maaron aliinġa, eemon rekia mon Sadan ila ve isan saveeņ tawe ighau pa loloz i.

<sup>16</sup> “Ve uuv siriv tau timburur izi nugh tau mbonġar tiina igheen siinġa, ve taan ņgiira mon igheen izala paavo, ene iza to tamtamon tau

---

\* **4:12:** Is 6:9+; Yo 12:40; Mbaņ 28:26+; Ro 11:8 \* **4:14:** 1Pe 1:23

tilooŋ Maaron aliija, ve rekia mon tighamu toman lolozi poia kat. <sup>17</sup> Eemon saveeŋ tawe igheen tunja ila lolozi mako. Yes timin aniiŋ tau waria izila kat taan loolo mako. Tauvene tiyooz tunja mako. Isaav ighe tamtamon tigham saghatin zi, ma pataŋani ite paam ivot pazi pasaa, titaghon Maaron aliija, ene rekia mon ve tipul ghuruuŋ ila toozi, ve tighur murizi pa Maaron.

<sup>18</sup> “Ve uuv siriv tau timburur ila waar tuatua lolozi, ene izaa to tamtamon tau tilooŋ saveeŋ to Maaron. <sup>19</sup> Eemon pataŋani naol to taan, tomania kuaz ve gabua popoia siriv tau tamtamon lolozi ighaar pani na, ene ikau ngar toozi. Tauvene saveeŋ tau igheen ila lolozi na, ighur anooŋa poia eta ivot mako. \*

<sup>20</sup> “Ve uuv siriv tau ŋeer tana isuruuv zi ila taan poia, ene izaa to yes tau tilooŋ saveeŋ to Maaron, ve tighamu toman lolozi poia. Tauvene ghuruuŋ ila toozi ighur anooŋa popoia katini. Siriv, anooŋazi ivot irau tamoot ee saŋavul (30), siriv, anooŋazi irau tamoot tol (60), ve siriv anooŋazi irau ndiŋndiŋ ee (100).” \*

*Saveeŋ palelaaŋ to lam*

*(Lu 8:16-18)*

<sup>21</sup> Yesu isaav pazi muul ighe: “Laak, isaav ighe tamtamon tigham lam eta ilam, pale tipagudu pa oon, ma tighuru ila boor saamba? Mako. Pale tisaroni izaa ituuk. \*

<sup>22</sup> Tauvene gabua eta irau iyoon mako. Gabua isov tau ŋgozaaŋ, ene pale tipaghazoŋai zi leso tighen

---

\* **4:19:** Mt 19:23+; Lu 12:15; 1Tim 6:9, 17; 1Yo 2:15+

\* **4:20:**

Yems 1:25 \* **4:21:** Mt 5:15; Lu 11:33

ghazonja. Ve ngar isov tau yongaan, ene pale tivot mataghare. \*

<sup>23</sup> Tamtamon tau ighe le taliija, i aat iloon saveen tane ve igham ngar pani poi.”

<sup>24</sup> Ra Yesu isaav pazi muul ighe: “Aghur taliinamim pa saveen tau alonloonja ne, ve agham ngar pani poi. Pa saa ngar tau ighe yam agham pa saveen tane, ene aat Maaron igham payam paam. Isaav ighe azuari gham to agham ngar pani poi ve ataghoni, ene pale Maaron iuul gham ve igham lemim ngar siriv paam. \*

<sup>25</sup> Pa ighe tamtamon eta iwatagh Maaron aliija ve itaghoni, ene pale Maaron iseen ngar tooni pa ngar siriv muul. Eemon isaav ighe tamtamon eta iwatagh Maaron aliija rigta ve itaghoni mako, ene pale Maaron iwalaav ngar tooni rigmon tana pani, ve ileep sorok.” \*

*Saveen palelaan to aniiñ uuve tau itum izaa*

<sup>26</sup> Yesu isaav pazi muul ighe: “Pooz to Maaron ngara, ene imin neer ee tau igham wit uuve, ve ila isuruuv zi ila uum, ve isasaan. <sup>27-28</sup> Mbon mataaz, i ighengheen, ve iburig ila ighamgham uraat tooni siriv. Eez to wit itum izaa pani, ene i iwataghi mako. Taan tauu, ta igham wit tawe itum. Tauvene parazi tigig pa taan imin maata, ra rauazi tivot, ve tighur anonazi. \*

<sup>29</sup> Saawe tau wit imatuugh, neer tana rekia mon ila toman mbuzaagh, ve irav motmotin zi. Pasaa, saawe to mariri, tauta ivot wa.” \*

---

\* **4:22:** Mt 10:26; Lu 12:2      \* **4:24:** Mt 7:2; Lu 6:38      \* **4:25:** Mt 13:12, 25:29; Lu 19:26      \* **4:27-28:** Yems 5:7      \* **4:29:** Syg 14:15+

*Saveeņ palelaaņ to mastet uuve  
(Mt 13:31-32; Lu 13:18-19)*

<sup>30</sup> Yesu isaav muul ighe: “Pooz to Maaron, ene ņgara mindai? Pale tasavia izaa to saa? <sup>31</sup> Ene imin mastet uuve. Mastet uuve, ene geegeu kat. \*

Gabua isov to taan uvezi tintiina tiliivo. <sup>32</sup> Eemon isaav ighe tasuruuv mastet uuve ila taan, ene pale itum izaa tiina ve ghitooņa imin ai. Iliiv saiņ isov to uum. Ve ighur booga tintiina paam. Tauvene man tau tirovroov ila taitai saamba na, yes irau tirau rumazi izala booga, leso tiyooņ ila yavyaav.” \*

<sup>33</sup> Yesu ivotia Maaron aliņa pa tamtamon ila saveeņ palelaaņ katini tauvene. Leso irauraua pazi to tilooņa ve tigham ņgar pani. <sup>34</sup> Tauvene saawe isov tau i ivotia mos pa eval tiina, isavsav ila saveeņ palelaaņ mon. Eemon saawe tau yesņa mbiwa tooni mon tileep, i ipaghazoņai saveeņ isov puughu leso ighazoņ pazi.

*Yesu isaav, ve yaghur ve dibom imaat  
(Mt 8:23-27; Lu 8:22-25)*

<sup>35</sup> Aaz eemon tana, Yesu tomania mbiwa tooni tilepleep le ravrav izi, ra i isaav pazi ighe: “Aiyo, tala tavool pa yaa naliu ziige ite.” <sup>36</sup> Tauvene tipul eval tiina tileep, ve mbiwa tooni tizaa waan tau Yesu ileep izala na, ve tivot tila. Waan siriv tila tomani zi paam. <sup>37-38</sup> Yesu izi igheen ta waan mboole we, ve iwat daaba pa ali, ve igheen le loolo iveegh kat. Malau mako ve yaghur tiina kat izaa, le ipei dibom tintiina. Ereman iloņ ila waan

---

\* **4:31:** Mastet uuve, ene geegeu kat imin dog paatu ma mbuas uuve. \* **4:32:** Mt 24:14

lolo, ve rigmon kanan timarum. Tauvene mbiwa tooni tivaanjo, ve tisaav pani tigde: “Paduduñaan, uburig lak! Paita tamarum gha talaleen tane! Yo ugham ngar pait, ma mako?”

<sup>39</sup> Yesu iburig gha isaav ariaan pa yaghur imin yaoniin. Ra isaav pa dibom ighe: “Ai, irao! Atem izi!” Rekia mon yaghur imaat, ve taun tiina izi.

<sup>40</sup> Ra Yesu isaav pa mbiwa tooni ighe: “Yam aroi pasaa? Aghur ila soone?” <sup>41</sup> Mbiwa tooni tighita gabua ngereeta tana, le roin tiina kat igham zi. Ve tivasavo zi tigde: “Wai, neer tane sei kat, ta yaghur ve dibom paam tiloon aliina ve titaghoni ne?” \*

## 5

*Yesu iziir avuvu sasaghati katini pa neer ee izi nugh Gerasa*

*(Mt 8:28-34; Lu 8:26-39)*

<sup>1</sup> Yesu tomania mbiwa tooni tiraav tila tiloon nari to yes Gerasa tau igheen ila yaa naliu Galilaia ziige ite. <sup>2-4</sup> Nugh tawe, neer ee ilepleep. I, avuvu sasaghati katini tizeeva, ve monmon ilepleep ilon ila maet puura siriv tau tigharaat zi timin naal pa mateegha. Saawe tau Yesu iyaat izi pa waan, neer tawe ipul niia ta maet puura we, ve ilaagh naruini ila. Neer tana, saawe naol, tikauu pa ravraav toman sen. Eemon ikupkuup motmotin zi, ve ighaughau ila. Pasaa, i tapiri tiina kat. Tauvene tamtamon eta irau ikisi ve ikauu muul mako. Ve tamtamon eta irau ighamu aate izi ne mako. <sup>5</sup> Mbon mataaz, ivalaghlaagh taghon loloz, ve ilonlon ila maet puura siriv tau tigharaat

\* **4:41:** Mbo 65:7, 89:9, 107:29

zi timin naal. Ve saawe isov, iboboob sorok, ve ighoghorot tauu pa maet tau lezi matazi na.

<sup>6</sup> I ighita Yesu ta soghan we, ve ilaan n̄aruini ila, ve itap izi Yesu naagho. <sup>7-8</sup> Yesu isaav pani ighe: “Avuvu saghati, ughau pani!”

Tauvene avuvu saghati tawe iboob aliin̄a tiina kat ila n̄eer tana aavo ighe: “Aii, Yesu! Yo Maaron Tiina Tau Iliiv Zimaron̄a Tisov na Naatu. Ulam sene pasaa? Yau nambaanj payo ta ulam ne? Yau nataj rarai ghom ila Maaron eeza, ughur yavyavuuj payau sov!” \*

<sup>9</sup> Yesu ighasoni ighe: “Ezam sei?”

I iyol aliin̄a ighe: “Yau ezag Legion \* (o Ndin̄ndin̄ Ndin̄ndin̄). Pasaa, yei eval kat.”

<sup>10</sup> Ra avuvu saghati tana itanj rarai Yesu ariaanj ighe iziir zi tighau pa taan sirivu tawe sov. <sup>11</sup> Nugh tawe, n̄gai umbaal tiina ee tilepleep izi loloz ziige, ve tighanghan. <sup>12</sup> Tauvene avuvu sasaghati tau tizeev n̄eer tana na titanj rarai Yesu tigde: “Ughur ghei nin̄arui n̄gai tawe. Upul ghei nilon̄ nila loloz.”

<sup>13</sup> Yesu iyok pazi, tauvene tipul n̄eer tana, ve tin̄arui n̄gai tawe tila le tizeev zi tilon̄ tila loloz. Ra n̄gai tawe tilaan taghon sariipa tizila, ve tiyaat tizila yaa loolo gha tighun yaa le tisov timatmaat. N̄gai tau timaat na, irau ndin̄ndin̄ ndin̄ndin̄ ru (2,000) ma vene.

<sup>14-15</sup> Yes tau tingin̄ngin̄ n̄gai na, tighita gabua tana, ve tighau tila tipaesia vaaru izi nugh toozi ve nugh siriv tau tigharau zi na paam. Tauvene

---

\* **5:7-8:** Mt 25:41; Mk 1:24; Yems 2:19 \* **5:9:** ‘Legion’, ene saavej Latin. N̄gun ee to zaaba irau tamtamon 6,000, yes Roma tiwaato tigde ‘Legion’.

tamtamon tisov tila tigha tighita gabua tau ivot na. Tila tivot to Yesu, ve tighita ñeer tau muuñ avuvu sasaghati katini tizeeva na, ñgar tooni poia ivot wa. I inonogh ghi pa nonoghiña, ve mboole izi ilepleep. Tauvene roiñ tiina igham zi. <sup>16</sup> Ra yes tau tileep ve tighita gabua tau ivot pa ñeer tana ve ñgai na, tipaesia gabua tana. <sup>17</sup> Eval tiina tilooñ saveeñ toozi, ve itañ rarai Yesu tigha ipul nugh toozi, ve ila pa nugh ite paam.

<sup>18</sup> Tauvene Yesu imuul ila iza waañ ve yesña mbiwa tooni tigha tivot tila. Saawe tana, ñeer tau muuñ avuvu sasaghati katini tizevzeeva na ilam, ve ighason Yesu ariaañ ighe iyok pani ve yesña tila. <sup>19</sup> Eemon Yesu iyok pani mako. Isaav pani ighe: “Umuul ula pa nugh tsio, ve usavia uraat tiina tau Maaron igham payo na vaaru pa zetamña. Pa Maaron loolo isaghatin ghom ve iuul ghom uleep poia.”

<sup>20</sup> Tauvene ñeer tana imuul ila, ve ivotia uraat tiina tau Yesu igham pani na vaaru irau nugh nugh tau tighen ila taan sirivu to Dekapolis na. Tamtamon tisov tau tilooñ saveeñ tooni na, tirur pa Maaron tapiri le ñgar toozi imbool.

*Yesu igharaat livaa ee, ve ipaburigin Yairus natliva pa mateegh*  
(Mt 9:18-26; Lu 8:40-56)

<sup>21</sup> Yesu tomania mbiwa tooni tigham waañ, ve timuul tila pa yaa naliu ziige ite. Saawe tau tila tilooñ, eval tiina kat tila tilivut Yesu izi nari. <sup>22</sup> Ra daaba ee, eeza Yairus, ila ivot. I yesña zeran siriv tinñginñgin nugh tawe rumei toozi. I ighita Yesu, ve itap izi Yesu aaghe puughu, <sup>23</sup> ve itañ raraini ighe:

“Tiina tsiau, natug livaa igharau ighe imaat. Ulam tala ruum tsiau ve ughur nimam izala paavo. Leso imaat sov, ve tiini poia muul.”

<sup>24</sup> Tauvene Yesu itaghoni gha yesuru tila. Tilaghlaagh tila, ve eval tiina tikeet taghon zi. Yes tivavagiriņi zi le tigiřiņ Yesu paam. <sup>25</sup> Livaa ee ilaagh tomani zi paam. I, moroghoon to zilivaa ikisi irau ndaman sanjavul ve ru wa. <sup>26</sup> Uraata katini to gharatoon moroghoonęa titoova to tiuule, ve i iyamaan yavyavuun tiina ila nimazi, ve ipul maet tooni isov pa gholiņ zi. Eemon eta irau iuule mako. Mako kat. Yes titoova, eemon tigham le moroghoon tooni isaghat kat. <sup>27-28</sup> Livaa tawe iloon Yesu vaaru wa. Tauvene maata ingal ighe: “Isaav ighe natut nonoghiņa tooni rigta, ene aat moroghoon tsiau tane isov, ve tinig poia.” Tauta ila itaghon eval tiina tawe, ve izuari ghi ila ila le itut Yesu nonoghiņa tooni. \*

<sup>29</sup> Saawe duduun tana, siņ imot pani, ve iyamaan tauu ighe tiini poia wa. <sup>30</sup> Ve Yesu paam, rekia mon iyamaan tauu ighe tapiri to uleē igham tamtamon eta wa. Tauvene itoor ghi, ve maata imuul pa eval tiina, ve ighason zi ighe: “Ai, sei itut nonoghiņa tsiau?”

<sup>31</sup> Mbiwa tooni tiyol aliņa tighe: “Mindai ta ughason ughe sei ikis ghom? Ughita. Ene eval tiina tilivut ghom ve tivagiriņi zi. Eta aat itut ghom.”

<sup>32</sup> Eemon Yesu maata ines ighe ighita sei kat ta igham ngar tana. <sup>33</sup> Livaa tana iwatagh gabua tau ivot pani na. Tauvene roiņ tiina ighamu le tiini

---

\* **5:27-28:** Lu 6:19



irur, ve ila iput aaghe izi Yesu naagho. Ra ivotia gabua isov tau ivot pani na.

<sup>34</sup> Yesu isaav pani ighe: “Livug, ghuruuŋ ila tsio, tauta iuul ghom gha tinim poia wa. Ula toman lolom poia.” \*

<sup>35</sup> Yesu isavsaav soone, ve zeran siriv tileep Yairus ruum tooni gha tilam, ve tipaes pani tigue: “Olman, ugherev sorokin mos puughu tane ilam pasaa? Natum livaa raa, imaat wa.”

<sup>36</sup> Eemon Yesu taliija irav saveeŋ toozi. Tau-vene isaav pa Yairus ighe: “Uroi sov. Ukis ghuruuŋ ila tsio ariaaŋ.” <sup>37</sup> Ra ingalsekin eval tiina ighe tila tomania sov. Ve igham Petrus, Yakobus, ve taazi Yoan, gha yes mon tila. <sup>38</sup> Tila tivot ruum to Yairus, ve Yesu ighita tamtamon titaŋtaŋ pa livaa marani toman oroor tiina, ve tiloŋloŋ tivotvot pa ruum loolo. <sup>39</sup> Tauvene iloŋ ila ruum loolo, ve isaav pazi ighe: “Mindai ta yam ataŋtaŋ ve aghamgham oroor tiina? Livaa marani imaat mako. Ene i igheen.”

<sup>40</sup> Yes tilooŋ saveeŋ tooni tane, ve tinij pani. Yesu iziir zi tisov tivot tila muuri, ra igham livaa marani taama gha tiina, tomania mbiwa tooni tol tana, ve yesja tiloŋ tila ruum loolo tau livaa marani igheen pani na. <sup>41</sup> Yesu ikis niima, ve isaav pani ighe: “Talita kum!” Saveeŋ tane, puughu tau-vene: “Livaa marani, yau nasaav payo: Uburig!” \* <sup>42</sup> Reikia mon maata iyaryaar, ve iburig ilaagh. Livaa marani tana, ndaman tooni irau saŋavul ve

---

\* **5:34:** Mk 10:52; Lu 7:50, 17:19      \* **5:41:** Lu 7:14

ru. Tamtamon tighita gabua ngereeta tana, le tirur ve ngar toozi imbool. \*

<sup>43</sup> Eemon Yesu ingalsekin zi ariaan ighe tisavia gabua tana vaaru pa tamtamon eta sov. Ra isaav pa livaa marani taama gha tiina ighe tigham aniin ilam gha ighan.

## 6

### *Tamtamon to Nasaret matazi veleghin Yesu (Mt 13:53-58; Lu 4:16-30)*

<sup>1</sup> Yesu ipul nugh tawe, ve imuul ila pa nugh tooni puughu. Ve mbiwa tooni titaghoni gha yesna tila. <sup>2</sup> Saawe to umbom patabuyaaj, Yesu ilon ila rumei toozi, ve ipaghazonaj zi pa Maaron aliina. Tamtamon katini tau tiloon saveen tooni na, tirur pa ngar tooni, ve tisaav tighe: “Wai, neer tane igham ngar ve tapiri tiina tane izi sindei? Ngar popoia tau i isasavia ne, ighamu ila to sei? Ve puughu mindai ta uraat ngeretazi tintiina tivotvot ila i niima? \*

<sup>3</sup> Mindai, i to nugh ite, ta iit takankaan pani ne? I neer to raon ruum. Maria naatu. Ve tazna, ene Yakobus, Yoses, Yudas, ve Simon. Ve livna tisov, ta tilepleep tomani ghiit ne.” Tauvene matazi veleghini, ve lolozu pa tighur ila tooni mako. \*

<sup>4</sup> Tauta Yesu isaav pazi tauvene: “Isaav ighe tamtamon eta imin propet to Maaron, ene aat tauu nugh tooni puughu tomania ziiri waaro tooni, ve yes tau tileep tomania ila ruum tooni na, matazi

---

\* 5:42: Yo 11:43+      \* 6:2: Yo 7:15      \* 6:3: Yo 6:42

veleghini. Eemon isaav ighe i ila nugh ite, ene aat titandagh pani ve tipait eeza.” \*

<sup>5</sup> Tauvene Yesu irau igham gabua ngereeta tiina eta izi ta sewe mako. I ighur niima izala moroghoonja enjaenja mon pavozi gha tinizi poia. <sup>6</sup> Ve i igham ngar naol pa nugh tooni puughu: Mindai ta tighur ila tooni mako?

Tauvene Yesu iburig, ipul nugh tooni puughu, ve ilaghlaagh irau nugh nugh, ve ipaghazonjai tamtamon pa Maaron aliinja.

*Yesu imbaan mbiwa tooni sanjavul ve ru pa uraat (Mt 10:5-15; Lu 9:1-6)*

<sup>7</sup> Ra ipoi mbiwa tooni sanjavul ve ru tilam, ve ighur zi runrunja, leso tila pa uraat. Ve irei tapiri irau zi, ve ighur avuvu sasaghati tileep ila sambazi. Leso tiziir zi tighau pa tamtamon. <sup>8-9</sup> Ve isaav pazi tauvene: Saawe tau tila, yes irau tilaagh tomania gabua naol mako. Tighur zuzuunja to aghezi, ve tikis titi mon. Irau tigham gabua imin aniiij ve pepeel mako, ve maet eta irau igheen ila lugluug toozi mako. Nonoghiinja toozi paam, irau tigham ru mako. Ee mon tau igheen ila tinizi, ene irao. <sup>10</sup> Ve Yesu isaav pazi tauvene: “Isaav ighe ala avot nugh eta, ruum sindei tau ighe tighur gham pani, na aleep ila ruum tana mon le apul nugh tawe ve ala. <sup>11</sup> Ve isaav ighe nugh eta lolozi pa ghamuun gham mako, ve tizor gham tomania saveen tsiam, na aghatuun aghemim, ve njaupup to nugh toozi izi, \*

---

\* **6:4:** Yo 4:44      \* **6:11:** Paesiinj to saveen ziiri tane igheen ila Mt 10:14.

o apul nugh tawe ve ala. Leso imin ilaal pazi pa sosor toozi.” \*

<sup>12</sup> Yesu isavsaav pazi le isov, ra tila ve tivotia Maaron aliinja pa tamtamon, ve tisaav pazi tighe: “Yam apul ngar tsiam sasaghati ileple, ve atoor ngar tsiam ila pa Maaron.” <sup>13</sup> Ve tiziir avuvu sasaghati katini tighaughau, ve timus ngoreenj to oliv izala moroghoonja katini pavozi, ve tisun Maaron pazi le tinizi poia muul. \*

*Mateegh to njeer rughuzaanja Yoan*  
(Mt 14:1-12; Lu 3:19-20, 9:7-9)

<sup>14</sup> Saawe tana, Yesu vaaru ilaan irau nugh naol, ve kinik Erod † iloonja paam. Tamtamon siriv tigde: “Ewe aat njeer rughuzaanja Yoan. I imaat ve Maaron ipaburigini pa mateegh. Tauta tapiri tiina igheen tooni, ve ighamgham gabua ngeretazi.” \*

<sup>15</sup> Ve tamtamon siriv tigde: “Mako. I aat propet Ilia tau imuul ilam.” Ve siriv tigde: “Mako, i aat igham uraat imin propet munghanazi siriv.” \*

<sup>16</sup> Saawe tau Erod iloonj Yesu vaaru, i isaav pa tauu ighe: “Ewe aat Yoan. Njeer tau narav motin luua na, tauta Maaron ipaburigini pa mateegh.” <sup>17-19</sup> I isaav tauvene pasaa, maata ingal ngar tau i igham pa Yoan na. Ngar tauvene: Muun, Erod isan toogha Pilip azaawa Erodias ve ivaii. Saawe tana, Yoan ilala tooni, ve inoknok saveen pani

---

\* **6:11:** Mbanj 13:51    \* **6:13:** Yems 5:14+    † **6:14:** Erod tane, i injin taan sirivu to Galilaia. Eeza ite Antipas.    \* **6:14:** Mk 8:28

\* **6:15:** Mt 16:14; Yo 4:19, 9:17

ighe: “Ngar tau ugham pa togham azaawa na, ene iduduun pa tutuun to Maaron mako.” \*

Yoan saveen tooni tane igham Erod azaawa aate yavyav. Tauvene iliil eez to iravu imaat. Eemon irao mako. Tauta Erod imbaan tamtamon siriv tila tikis Yoan, ve tikauu, ve tighuru ilonj ila ruum to yavyavuun, lesu igham azaawa loolo poia. <sup>20</sup> Erod iwatagh ighe Yoan, i neer patabuyaan, ve neer duduunja ee ila Maaron maata. Tauvene iroi pani. Saawe tau Yoan isavsaav pani, saveen tooni ingali le igham ngar naol. Eemon Erod ighe le ilonjloon saveen tooni. Tauta saawe tau Yoan ileep ila ruum to yavyavuun, Erod ighamgham poghania.

<sup>21</sup> Tilepleep le saawe poia ee ivot pa Erodias to irav Yoan imaat. Tizaa pa saawe to Erod tiina ipooa, ra Erod igham ghanghaniin tiina, ve ipoi yes daaba tau tinginjin uraat tooni na, ve yes daaba to malmal, tomania daaba siriv to Galilaia paam tilam, ve yesna tilup zi pa ghanghaniin.

<sup>22</sup> Saawe tana, Erodias natliva ilonj ila, ve itor izi naghozi, le isan Erod tomania zeetna tawe atezi. Tauvene Erod isik aliinja pani ighe: “Aa enes, saa kaut tau ighe yo ughason ghau pani, yau aat naghham payo!” <sup>23</sup> Ve ipariaan saveen mbuaan tooni tana le iyaryaan kat ighe: “Onoon saanja! Saa kaut tau ighe yo ughason ghau pani, yau aat naghham payo. Isaav ighe yo uge navalagh gabua naol isov tau nanjiniir zi ne, ve naghham lem sirivu, ene poia paam!”

<sup>24</sup> Erod isavia saveen tane le isov, ra livaa paaghu ivot ila muuri, ve ighason tiina ighe:

---

\* **6:17-19:** Wkp 18:16

“Mindai, pale naghasoni pa saa kaut?”

Tiina isaav pani ighe: “Ughasoni pa Yoan tau neer rughuzaaŋa na daaba.”

<sup>25</sup> Tauvene livaa paaghu rekia mon ila to kinik Erod muul, ve isaav pani ighe: “Yau naghe ughur neer rughuzaaŋa Yoan daaba ila oon, ve ughamu ilam payau ta aazne.”

<sup>26</sup> Kinik Erod ilooŋ saveeŋ tane le loolo ipataŋan kat. Eemon irau itoor aliiŋa muul mako. Pasaa, imbu saveeŋ ariaaŋ pani ila zeetŋa tau yesŋa tilup zi pa ghanghaniin na matazi wa. <sup>27-28</sup> Tauvene rekia mon imbaaŋ zaaba tooni ee ighe ila irav motin Yoan luua, ve igham daaba ilam. Zaaba tawe itaghon Erod aliiŋa, ve ila irav motin Yoan luua. Ra ighur daaba ila oon loolo, ve ighamu ilam, ve izuzuuna ila pa livaa paaghu. Mako i aana isakia ila to tiina.

<sup>29</sup> Murei ra, yes mbiwa to Yoan tilooŋ gabua tana vaaru. Tauvene tila tigham Yoan paata, ve tila tighuru ilooŋ ila maet puura ee tau tigharaat imin naal pa mateegha.

*Yesu ipan tamtamon ndiinndin ndiinndin liim (5,000)*

*(2King 4:42-44; Mt 14:13-21; Lu 9:10-17; Yo 6:1-14)*

<sup>30</sup> Yesu mbaŋooŋa tooni tigham uraat le isov, ra timuul tilam tivot tooni, ve tipaes pani pa uraat isov tau tighamu, tomania saveeŋ isov tau tipaduduun tamtamon pani na. <sup>31</sup> Saawe tana, tamtamon katini tilala tilamlam, le Yesu tomania mbiwa tooni lezi sooso eta to timariau ve tighan aniiŋ ne mako. Tauvene Yesu isaav pazi ighe: “Aiyo, aburig ve tala pa nugh ŋginaaŋa eta. Leso

zigaan taleep ve tamariau.” <sup>32</sup> Tauvene tigham waan tigde tila pa nugh nginaanja ee. Leso zigazi tileep ta sewe ve timariau. <sup>33</sup> Eemon eval tiina tighit zi tiraav tila, ve tighilaal zi pa ghaon toozi. Tauvene tamtamon to nugh naol tilaagh taan, ve titaghon Yesu tila. Yesu tomania mbiwa tooni tighaughau soone, ve eval tiina tawe timuun tila tivot nugh tau Yesu tomania mbiwa tooni tigde tila pani na, gha tisaanja. <sup>34</sup> Malau mako ve Yesu tomania mbiwa tooni tilam tiloon. Yesu iyaat izi pa waan, ve ighita eval tiina tana le loolo isaghatin zi. Pasaa, yes tileep imin sipsip tau lezi nginiin mako. Tauvene i ipaburigin saveen tooni ve ipaghazonai zi pa gabua naol.

<sup>35</sup> Tilepleep le ravrav izi, ra mbiwa tooni tila tisaav pani tigde: “Laak, ene taleep izi nugh nginaanja ve mbon izi wa. <sup>36</sup> Usaav pa eval tiina tane tila pa nugh siriv tau tighen tatangan ne. Leso tighol lezi aniin ve tighan.”

<sup>37</sup> Eemon Yesu isaav pazi ighe: “Mako. Yam taumim agham aniin pazi to tighan.”

Yes tiyol aliinja tigde: “Wai, yo ughe yei nila nighol aniin pa eval tiina tane? Isaav ighe nighol aniin irau maet denari †  
200, pale irao zi wa?”

<sup>38</sup> Tauvene Yesu isaav pazi ighe: “Ala aghita. Lemim mberet piiz ighengheen?”

Yes tila tighita le isov, ra timuul tilam ve tipaes pani tigde: “It leen mberet liim, ve iigh ru.”

---

† **6:37:** Denari, ene maet ee eeza. Saawe tau Yesu ileep izi taan, isaav ighe tamtamon eta igham uraat irau aaz ee, ene tigham le atuya irau denari ee.

<sup>39-40</sup> Ra Yesu isaav pazi ighe tighur eval tiina tana ila ṅgun ṅgun, ve tisaav pazi leso mbolezi izala kikiliin popoia tawe paavo. Tauvene titaghon Yesu aliija, ve mbolezi izi ila ṅgun ṅgun. ṅgun siriv irau tamtamon ndiṅndiṅ ee (100), ve ṅgun siriv irau tamoot ru saṅavul (50).

<sup>41</sup> Ra Yesu igham mberet liim tomania iigh ru tawe, ikis zi, ve maata izala pa sambam, ve ipait Maaron pa aniin tana. Isuṅ le isov, ra iteev mberet tana, ve ighuru ila mbiwa tooni nimazi, leso anazi tila tireii pa tamtamon. I igham ṅgar raraate pa iigh ru tana paam, gha eval tiina tighan.

<sup>42</sup> Tauvene tisoṅ tighan le apozi isuṅ. <sup>43</sup> Ve mberet tomania iigh tau tighan ve sirivu izi na, mbiwa tooni tigooga, ve tinonogh zi tila nakaral saṅavul ve ru le tivoniir. <sup>44</sup> Yes tau tighan aniin tana, yes zitamoot mon, irau ndiṅndiṅ ndiṅndiṅ liim (5,000) ma vene.

*Yesu ilaagh izala yaa paavo*

*(Mt 14:22-33; Yo 6:15-21)*

<sup>45</sup> Tighan le isov, ra Yesu ipasul mbiwa tooni ighe tizaa waan, leso timuun tila tivoool pa nugh Betsaida tau igheen ila yaa naliu ziige ite. Ve i ileep, leso ighur eval tiina tawe timuul tila pa nugh toz toz. <sup>46</sup> I ighur zi tila, ra izala pa loloz, leso ileep ta sewe ve isuṅ. \*

<sup>47</sup> Waan tau mbiwa tooni tizaa gha tila na ighaughau ila le ivot bodbodaan to yaa naliu, ra mbon izi pazi. Saawe tana, Yesu zigani ileep izi taan. <sup>48</sup> Maata ila le ighita patanani ivot pa mbiwa tooni. Pasaa, yes tisoop yaghur ve tila. Tauvene

---

\* **6:46:** Mk 1:35



tigham uraat tiina pa goraan̄. Yesu ilepleep le igharau ighe nughitun, ra izila nari, ve ilaagh izala yaa paavo in̄arui zi ila le ighe isaliv zi. <sup>49-50</sup> Mbiwa tooni matazi ila le tighita Yesu ilaghlaagh izala yaa paavo gha ilam. Yes tiov tighita, ve tige pa mariaam. Tauvene roin̄ tiina igham zi ve tisan̄eñ saghat.

Eemon Yesu rekia mon ve isaav pazi ighe: “Ai, aroi sov. Atemim izi. Ene yau.” <sup>51</sup> Ra ila izaa waan̄ tomani zi. Saawe tana, yaghur ma dibom isov. Mbiwa tooni tighita gabua n̄gereeta tana le tirur ve n̄gar toozi imbool. <sup>52</sup> Pasaa, gabua n̄gereeta tau Yesu igham pa mberet na, igham n̄gar toozi ivot soone. Lezi ghilaloon̄ mako pasaa, loloz i yaryaan̄ kat. \*

*Yesu igharaat moroghoon̄a katini izi nugh Gene-saret*

*(Mt 14:34-36)*

<sup>53</sup> Yesu tomania mbiwa tooni tila tivool pa yaa naliu ziige ite, ve tila tiloon̄ nari to nugh Gene-saret, ve timbit waan̄ toozi ta sewe. <sup>54</sup> Saawe tau tiyaat tizi pa waan̄, eval tiina rekia mon ve tighi-laal Yesu. <sup>55</sup> Tauvene tilaan̄ tila ve tipaesia vaaru irau nugh tiov tau tigharau na. Tauvene saawe tau tamtamon tiloon̄ tige Yesu ila ivot nugh eta, mako tibadbaad moroghoon̄a toozi izala boor, ve tin̄aruini tila, leso iuul zi. <sup>56</sup> Yesu ilaghlaagh irau nugh tintiina, nugh geegeu, ve taghon̄ ziige ziige paam. Saawe tau i ila ivot nugh eta, mako tiyau moroghoon̄a toozi tila maaran, ve titan̄ raraini tige tikis nonoghiin̄a tooni ziige rigta mon, o poia.

---

\* **6:52:** Mk 8:17

Ve tamtamon tisov tau tikisi na, Yesu tapiri igham zi tinizi popoia. \*

## 7

*Tutuunj to Maaron iliiv tutuunj to yes Yuda timbuzna*

*(Mt 15:1-9)*

<sup>1-4</sup> Zeran tutuunja tomania Yuda siriv paam tibesbees pa Maaron itaghon tutuunj tau timbuzna titagho ni muunj ve ilam. Ngar toozi tauvene: Irau tighan aniiñ rekia mako. Timin nimazi itaghon tutuunj toozi, le tingalaan ila Maaron maata, o tighan. Ve tutuunj toozi ite isaav tauvene: Igha tila nugh to raukoliin ve timuul tilam, ene yes aat titir yaa izala pavozi ve timin muun ilale. Leso tingalaan muul, ve tighan aniiñ. Yes lezi tutuunj naol tauvene. Tutuunj siriv injarui miniiñ uur ve rubruub, ve tutuunj siriv injarui gabua siriv paam. \*

Zeran tutuunja siriv tomania ngara siriv to tutuunj tipul Yerusalem, ve tila tileep tomania Yesu. Yes tighita mbiwa tooni titaghon tutuunj toozi to miniiñ nimazi mako, ve rekia mon tighan aniiñ. Tauvene tighit zi le irau lolozi mako. Pasaa, mbiwa tooni nimazi injalaan mako, ve tigham aniiñ gha tighan. \*

<sup>5</sup> Tauvene tighason Yesu tigha: “Ughita. Mbiwa tsio tana nimazi injalaan mako ve tighan aniiñ. Puughu mindai ta titaghon tutuunj to timbuunja mako?”

---

\* **6:56:** Mt 9:20, 14:36; Mbanj 19:12

\* **7:1-4:** Mt 23:25+

\* **7:1-4:** Lu 11:38

<sup>6</sup> Yesu iyol aliŋazi ighe: “Yam zeran to karom. Apapamir taumim pa ghuruuŋ ila tsiam! Muuŋ, propet Isaia ivotia Maaron aliŋa ziiri ee tau iduduŋ kat pa ŋgar tau yam aghamghamu na. Isaav tauvene:

‘Zeran tane tipapait ghau sorok pa avozi uuli mon.

Eemon lolozi, ene igheen malau kat payau.

<sup>7</sup> Saveeŋ ve tutuuŋ katini tau tipaduduŋ tamtamon pani, ene itaghon ŋgar tsiau mako. Itaghon ŋgar to tamtamon mon.

Tauta suŋuuŋ ve besooŋ toozi tau monmon tighamgham payau ne, ene imin kaut sorok, ve le anooŋa mako.’ ” \*

<sup>8</sup> Ve Yesu isaav pazi muul ighe: “Tutuuŋ tau Maaron tauu ighuru, ene yam apuli wa. Ve tutuuŋ tau tamtamon tighuru, tauta yam akisi tunja, ve ataghoni.” <sup>9</sup> Yesu iseŋ saveeŋ tooni muul ighe: “Yam aghur murimim pa tutuuŋ to Maaron, ve apuli izi ileple. Leso apariaaŋ tutuuŋ to timbunimŋa, ve ataghoni. Ŋgar tauvene, yam arau kat pani! <sup>10</sup> Aghita. Tutuuŋ to Mose isaav tauvene:

‘Matam loŋloŋai pa tamam gha tinam ve utandagh pazi.’

Ve ‘isaav ighe tamtamon eta isik saveeŋ saghati pa taama ma tiina, i aat imaat.’ \*

<sup>11-12</sup> Eemon yam asavsav tauvene: ‘Ighe tamtamon eta le gabua to iuul taama ma tiina pani, eemon igham pazi mako, ve isaav pazi ighe: ‘O, gabua tane, yau irau naghampayam mako. Pa ene nawaat Maaron eeza pani wa.’ Ighe tamtamon

---

\* **7:7:** Is 29:13; Kol 2:20+; Tit 1:14      \* **7:10:** Igham 20:12, 21:17

eta igham tauvene, ve murei itoor ngar tooni ve ighe igham gabua tana pa taama ma tiina, na yam angalsekini aghe i igham tauvene sov. <sup>13</sup> Tauvene tutuun tau timbumimna tigham payam ve aazne ataghoni, ene igham gham atatan Maaron saveen tooni izi imin kaut sorok. Ve ngar tsiam naol tau aghamgham zi ne, ene raratezi mon.”

*Gabua tau igham tamtamon tisaghat ila Maaron maata*  
(Mt 15:10-20)

<sup>14</sup> Yesu isavsaav tomani zi le isov, ra ipoi eval tiina tilam tooni muul, ve isaav pazi ighe: “Yam asov aloon saveen tsiau tane, ve agham ngar pani poi. <sup>15-16</sup> Gabua tau tamtamon tighamu ve tighani gha izila apozi, eta irau igham zi tisaghat ila Maaron maata ne mako. Ngar sasaghati tau igheen ila lolozu ve ivotvot, tauta igham zi tisaghat ila Maaron maata.” \*

<sup>17</sup> Yesu ipul eval tiina tawe tileep muuri, ve ilon ila pa ruum, ra mbiwa tooni tighasoni pa saveen tooni puughu. <sup>18</sup> I isaav pazi ighe: “Wai, yam paam lemim ngar mako? Aghilaal soone? Gabua naol isov tau tamtamon tigham zi ve tighan zi gha izila apozi, eta irau igham zi tisaghat ila Maaron maata ne mako. <sup>19</sup> Pasaa, gabua tauvene igham gabua eta pa lolozu mako. Izila pa apozi mon, ve malau mako timbeghazi gha ilale.”

Yesu saveen tooni tane ipaghazonai ghiit ighe gabua naol isov poia to taghani. Eta irau igham ghiit tasaghat ila Maaron maata mako.

---

\* **7:15-16:** Mbanj 10:14+; Ro 14:14, 20; 1Tim 4:4

20 Ve Yesu isaav muul ighe: “Ngar sasaghati tau igheen ila tamtamon lolozi ve ivotvot, tauta igham zi tisaghat ila Maaron maata. 21-22 Pasaa, ngar sasaghati tau igheen ila tamtamon lolozi ve ivotvot, tauta ipapaburigin zi gha matazi ingal ngar sasaghati naol imin: tighur boog, tium, tirav tamtamon timaat, tivaghamunia vainj, matazi aniiñ, tigham taliinjizi, tigham karom, matazi saghati imin ngavuun ve ngai, tighur koi pa zetazña tau lezi gabua katini, tisik saveen saghati pa zetazña ve Maaron paam, tipait tauzi ezazi, ve tigham ngar sasaghati siriv paam imin yes tau tikankaan pa Maaron. 23 Ngar sasaghati naol tane tau ighengheen ila tamtamon lolozi ve ivotvot, tauta igham zi tisaghat ila Maaron maata.”

*Grik tinazi ee to Ponisia ighur ila to Yesu ariaañ  
(Mt 15:21-28)*

24 Yesu ipaburigin laghoonj tooni muul, ipul nugh tawe, ve ilaagh ila ivot taan sirivu tau nugh tiina Tiro igheen pani. Ra ilonj ila ruum ee to nugh tawe ve ileep. I lolo pa tamtamon tiwatagh ruum tau i ileep pani ne mako. Eemon mako. Pasaa, tamtamon tighita wa.

25-26 Livaa ee to nugh tawe, avuvu saghati izeev natliva marani. Livaa tawe, i Yuda mako. I Grik tinazi to taan Ponisia tau igheen ila taan sirivu to Siria. I iloonj Yesu vaaru, ve rekia mon injarui Yesu ila, itap izi Yesu aaghe puughu, ve itañ raraini ighe iziir avuvu saghati tawe ighau pa natliva.

27 Yesu isaav pani tauvene: “Isaav ighe tasan aniiñ to yes geegeu, ve tasiki rekia mon ila ngavuun tighani, ene iduduunj mako. Yes geegeu tighan

imin maata le apozi isun, o tasik aniin sirivu ila pa ngavuun.” \*

<sup>28</sup> Livaa tana iyol aliina ighe: “Tiina, alinam poia. Eemon ngavuun paam tisanan. Isaav ighe yes geegeu tighanghan, ve aniin ngirngiira itaptap izi taan, ene imin ngavuun lezi to tighan.”

<sup>29</sup> Yesu iloon saveen tane, ve isaav pani muul ighe: “Yo upat alinag le iduduun kat. Tauvene umuul ula pa ruum toman lolom poia. Pa avuvu saghati ighau pa natumliva wa.”

<sup>30</sup> Tauvene livaa tana imuul ila pa ruum, ve ighita natliva ighengheen izala niia to ghenoon. Avuvu saghati ighau pani ve tiini poia wa.

*Yesu igharaat neer ee tau taliina tomania aavo ivool*

<sup>31</sup> Yesu ipul taan sirivu to Tiro, ve isakia laghoon tooni ila ivot nugh Sidon. Ra ilivut imuul ilam, ve imbut taan sirivu to Dekapolis, ve ila ivot yaa naliu Galilaia muul. \*

<sup>32</sup> I ilepleep ta sewe, ve tigham neer ee ila tooni. Neer tawe, taliina paamu ve irau isavia saveen eta ighazon mako. Tauvene titan rarai Yesu tige ighur niima izala neer tana paavo, lesa tiini poia.

<sup>33</sup> Yesu ighamu ve yesuru tila soghan rig pa eval tiina, ra izeev niima nguruuna ru ilon ila neer tana taliina. Le isov, mako injazuv ila niima, ve ighur niima ila neer tana yaama. \*

---

\* **7:27:** Saveen to Yesu tane, puughu tauvene: I aat igham uraat ila yes Yuda sosozi le isov, o pooz to Maaron ila irau nugh nugh tau Yuda mako na paam. \* **7:31:** Mt 15:29+ \* **7:33:** Mk 8:23; Yo 9:6

<sup>34</sup> Ra maata iza pa sambam, iyavaghan, ve isaav pani ighe: “Epata!” †  
(Saveen tane, puughu tauvene: ‘Ukaak!’)

<sup>35</sup> Reikia mon ve neer tana taliija tomania aavo pakia, ve isaav aliija ivot ighazoon. \*

<sup>36</sup> Yesu ingalsekin zi ariaan ighe tivotia gabua ngereeta tana vaaru pa tamtamon eta sov. Eemon mako. Onoon, i ingalsekin zi pai katini. Eemon yes tinoknok votiaan gabua tana vaaru taghon gha ila. <sup>37</sup> Tamtamon tisov tau tiloon gabua tana vaaru, tirur tiina kat le ngar toozi imbool, ve tisaav tigde: “Wai, neer tane, i irau kat. Gabua naol isov tau i ighamgham zi na, ene popoia mon. Aghita. Yes tau talinjazi paamu, ve yes tau avozi ivool na paam, i igham zi tilonloon saveen ve tisavsaav.”

## 8

*Yesu ipan tamtamon ndiynndi ndiynndi paan  
(4,000)  
(Mt 15:32-39)*

<sup>1</sup> Saawe tana, eval tiina kat tila tilup zi toman Yesu muul, ve yesna tilepleep le aniin toozi isov. Tauvene Yesu ipoi mbiwa tooni tilam, ve isaav pazi ighe: <sup>2</sup> “Yau lolog isaghatin eval tiina tane. Pasaa, itinja takaria lepoogh gha mbon imin tol wa. Ve lezi aniin eta to tighan mako. <sup>3</sup> Isaav ighe naziir zi tila toman pitool zi, ene pale tapirizi isov ve matazi ililiit izi eez livuugha. Pasaa, tamtamon toozi siriv tilaagh nugh malau tilam.”

---

† **7:34:** ‘Epata’, ene saveen Aramea. Saveen Aramea igharau saveen Hibru. Saawe tau Yesu ileep izi taan, eval tiina to Israel tisavia alinjazi ru: Aramea, ve Hibru. \* **7:35:** Is 35:5-6

<sup>4</sup> Mbiwa tooni tiyol aliina tige: “Wai, ene taleep nugh nginaana. Pale tagham aniin sindei ve tagham pa eval tiina tane?”

<sup>5</sup> Tauvene Yesu ighason zi ighe: “Mberet tsiam piiz ighengheen?”

Yes tiyol ghasoniin tooni tige: “Liim ve ru.”

<sup>6</sup> Ra Yesu isaav pa eval tiina mbolezi izi taan, ve igham mberet liim ve ru tawe, ve ipait Maaron pani. Le isov, ra iteeva, ve ighuru ila to mbiwa tooni. Leso anazi tila tireii pa eval tiina. Tauvene tighamu tila, ve tireii pazi. <sup>7</sup> Yes lezi iigh geegeu siriv paam. Yesu ipait Maaron pa iigh tana, ra isaav pazi tila tireii pa tamtamon. <sup>8</sup> Eval tiina tawe tighan le apozi isun. Ve avozi muuri tau izi na, mbiwa tooni tigooga, ve tinonogh zi tila nakaral tintiina liim ve ru le tivoniir. <sup>9-10</sup> Eval tiina tau tighan aniin tana, yes irau ndinndin ndinndin paan (4,000) ma vene. Tighan le isov, ra Yesu ighur zi timuul tila pa nugh toz toz, ve rekia mon tomania mbiwa tooni tizila muul pa nari gha tizaa waan toozi, ve tiraav tila tivool pa taan sirivu to Dalmanuta.

*Zeran tutuuna tige tighita Yesu igham gabua ngereeta eta imin ilaal pazi*

*(Mt 12:38-39, 16:1-4; Lu 11:16, 29)*

<sup>11</sup> Yesu ileep ta sewe, ve zeran tutuuna siriv tinaruini tila tige titoova. Yesna Yesu tivazorai zi, ve tizoornugh tige i igham gabua ngereeta imin ilaal pazi. Leso tiwatagh tige Maaron to sambam ileep tomania pa uraat tooni. \*

---

\* **8:11:** Yo 6:30



<sup>12</sup> Yesu isaav pazi imin mbuziriin ighe: “Oyais, puughu mindai ta zeran to aazne tizuari zi pa ghitoon ilaal? Yau nasaav payam kat: Maaron irau itotoi gabua eta imin ilaal pazi ne mako. Mako kat.” <sup>13</sup> Ra ipul zi tileep, ve izila nari gha izaa waan muul, ve yesna mbiwa tooni timuul tila tivool pa yaa naliu ziige ite.

*Yis to Erod ve zeran tutuuna*  
(Mt 16:5-12)

<sup>14</sup> Mbiwa tooni loloji iveegh ve tigham lezi tamaz mako. Tigham mberet eemon geeg ta igheen izi waan. <sup>15</sup> Yes tighaughau tila, ve Yesu maata ingal pa ngar sasaghati to Erod ve yes zeran tutuuna. Tauvene iveveen mbiwa tooni ighe: “Matamim imomoos poi pa taumim, ve ayamaan gham pa yis to Erod ve yes zeran tutuuna!” \*

<sup>16</sup> Eemon mbiwa tooni tighilaal saveen tooni puughu mako. Tauvene ayazi ingal zi sorok ve tivasavo zi tigue: “I aat isaav pait pasaa, loloon iveegh ve tagham leen mberet mako.”

<sup>17</sup> Yesu iwatagh ngar toozi wa. Tauvene isaav pazi muul ighe: “Yam ayau avomim pa mberet pasaa? Aghilaal ghau soone? Lolomim aat iyaryaan kat, tauta aghazoon payau soone. \*

<sup>18-19</sup> Yam lemim matamim ve talinamim. Mindai ta aghita gabua mako, ve aloon saveen mako? Lolomim iveegh wa? Saawe tau nateev mberet liim mon pa tamtamon ndinndin ndinndin liim (5,000) na, yam agoog aniin siriv siriv, ve apavon nakaral piiz?”

---

\* **8:15:** Lu 12:1; 1Kor 5:6+      \* **8:17:** Mk 6:52

Yes tiyol aliinja tigde: “Sanjavul ve ru.” \*

<sup>20</sup> Yesu ighason zi muul ighe: “Ve saawe tau nateev mberet liim ve ru pa tamtamon ndinndin ndinndin paan (4,000) na, yam agoog aniin siriv siriv ve apavon nakaral piiz?”

Yes tiyol aliinja tigde: “Liim ve ru.”

<sup>21</sup> Ra Yesu isaav pazi ighe: “Mindai? Ngar tsiam ighazon soone?”

### *Yesu igharaat maata kumkuuma ee izi nugh Betsaida*

<sup>22</sup> Yesu tomania mbiwa tooni tila tiloon nugh Betsaida, ve tamtamon siriv tigham neer maata kumkuuma ee ilam tooni, ve titaan rarai Yesu tigde ighur niima izala neer tawe paavo ve igharaat maata. <sup>23</sup> Tauvene Yesu ikis maata kumkuuma tana niima, ve igherevu gha yesuru tila tivot nugh ziige. Yesuru tiyooz ta sewe, ve Yesu ighur nazuuva ila neer tana maata, ve niima ru izala paavo. Ra ighasoni ighe: “Mindai, ughita gabua eta, ma mako?”

<sup>24</sup> Neer tana maata ila, ve isaav pani ighe: “Vee! Yau naghita tamtamon siriv tilaghlagh. Eemon naghit poghani zi mako. Ghitonazi imin ai ma vene.” <sup>25</sup> Tauvene Yesu ighur niima ila ikis neer tana maata muul. Neer tana itughtugh maata ila ila le maata pakia, ve ighita gabua naol isov ighazon. <sup>26</sup> Ra Yesu isaav pani ighe: “Umuul ula pa nughei sov. Malmalim ula pa ruum tsio.”

### *Petrus ivotia Yesu ighe i Mesia (Mt 16:13-20; Lu 9:18-21)*

---

\* **8:18-19:** Mk 4:12; Mbanj 28:26+

<sup>27</sup> Yesu tomania mbiwa tooni tipul nugh Bet-saida, ve tigde tila pa nugh geegeu siriv tau tigharau nugh tiina Sisarea Pilipai. Tilaghlaagh taghon eez tila, ve Yesu ighason zi ighe: “Laak, tamtamon tigham ngar tigde yau sei?”

<sup>28</sup> Yes tiyol ghasoniin tooni tigde: “Zeran siriv tigde yo neer rughuzaana Yoan, ve siriv tigde yo propet Iliia, ve siriv tigde yo propet ite paam.”

<sup>29</sup> Yesu ighason zi muul ighe: “Ve yam taumim, aghe yau sei?”

Petrus iyol aliina ighe: “Yo Mesia.” \* \*

<sup>30</sup> Petrus isavsaav le isov, ra Yesu ingalsekin zi ariaan ighe tivotia saveen tana pa tamtamon eta sov.

*Yesu isavia mateegh ve burigiin tooni*  
(Mt 16:21-23; Lu 9:22)

<sup>31</sup> Saawe tana, Yesu iburig ve ipaghazonai tauu pa mbiwa tooni ighe: “Tamtamon Naatu, i aat ibaad patajani naol, ve yavyavuun tiina ighamu itaghon Taama Maaron ngar tooni. Ve yes pooza tomania yes daaba to watoonrau, ve yes ngara to tutuun pale tizori, ve tiravu imaat. Eemon mbon imin tol, i pale iburig pa mateegh.” <sup>32</sup> Yesu isaav ghazona pazi. Tauvene Petrus ighamu ila ziige, ve iyaoni. <sup>33</sup> Eemon Yesu itoor ghi, maata imuul pa mbiwa tooni siriv, ve iyaon Petrus ighe: “Sadan, ughau ula pa murig! Ngar tsio itaghon Maaron ngar tooni mako. Yo utaghon ngar to tamtamon mon.”

---

\* **8:29:** Paesiin to saveen ziiri tane igheen ila Mt 16:16. \* **8:29:** Yo 6:68, 11:27

*Eez to tataghon Yesu*  
(Mt 16:24-28; Lu 9:23-27)

<sup>34</sup> Ra Yesu ipoi eval tiina tilam tilup zi tomania mbiwa tooni, ve isaav pazi ighe: “Isaav ighe tamtamon eta ighe imin leg ve itaghon eez tsiau, i aat itatan tauu, ibaad ai pambaroon tooni, † ve ilam itaghon ghau.” \*

<sup>35</sup> Pa ighe tamtamon eta iil eez pa tauu lesio ileep poia izi taan, ene pale ilale. Ve isaav ighe tamtamon eta loolo eemon ve ipul tauu payau ve uraat to vaaru poia, i aat igham lepoogh poia ila to Maaron.” \*

<sup>36</sup> Isaav ighe tamtamon eta igham gabua popoiazi naol isov to taan, eemon tauu anunu ilale, ene pale gabua naol tawe tiuule mindai? Mako. <sup>37</sup> Pale tamtamon tana igham saa gabua ve iravol anunu pani? Mako kat.” \*

<sup>38</sup> “Tamtamon to aazne, yes sasaghatizi kat. Tighur murizi pa Maaron imin livaa tau ipul azaawa ve igham tamoot paaghu. Isaav ighe tsiam eta maaya payau ve saveen tsiau, ve ipaisamun ghau ila yes tane matazi, ene pale saawe to Tamtamon Naatu imuul ilam tomania aņela tooni patabuyaana, ve itotoi Taama Maaron mbonari ve tapiri ivot ighazoon, i pale ipaisamun tamtamon tana eeza paam.” \*

## 9

---

† **8:34:** Ai pambaroon toit, ene patanani maata maata tau tabaad zi pasaa, tataghon Yesu. \* **8:34:** Mt 10:37+ \* **8:35:** Lu 17:33; Yo 12:25 \* **8:37:** Mbo 49:7+ \* **8:38:** Mt 10:33; Ro 1:16; 2Tim 2:12

*Yesu itotoi mbonari ivot ighazoon  
(Mt 17:1-13; Lu 9:28-36)*

<sup>1</sup> Yesu isaav pazi muul ighe: “Yau nasaav payam kat. Tamtamon siriv tau itiņa tayozyooz ne, aat timaat soone, ve tighita Maaron itotoi pooz tooni ivot ighazoon toman tapiri tiina.” \* \*

<sup>2</sup> Mboņ liim ve ee ilam ila, ra Yesu igham Petrus, Yakobus, ve Yoan, gha yes paan tizala loloz ee tau daaba izala kat. Leso zigazi tileep. Tilepleep ta sewe, ve Yesu tiini itoora ila yes tol matazi.

<sup>3</sup> Ve nonoghiņa tooni paam, ipisosoņ kat ve mil-milia. Tamtamon eta to taan irau igham kawaal ipisosoņ kat tauvene ne mako. <sup>4</sup> Tilepleep ve tighita Ilia yesuru Mose tivot gha yesņa Yesu ti-savsav.

<sup>5</sup> Tauvene Petrus iburig ve isaav ila pa Yesu ighe: “Paduduņaan, taleep ta sene, kanaan poia kat. Mindai, pale nirau balbaal tol? Ee payo, ee pa Mose, ve ee pa Ilia?” <sup>6</sup> Aliiņa tane, i igham nğar poi ve isavia mako. Isaav sorok. Pasaa, tomania zeetņa ru tiroi kat. <sup>7</sup> Malau mako na, taitai izi le ikau zi. Ra tilooņ Maaron aliiņa ivot ila taitai tawe loolo ighe: “Ena yau taug Natug tau lolog igheen tooni kat. Alooņ aliiņa ve ataghoni!” \*

<sup>8</sup> Rekia mon mbiwa tooni matazi ines. Ve tighita tamtamon eta muul mako. Yesu zigani ta ileep tomani zi.

---

\* **9:1:** Ngara katini tigde Yesu isavia saawe tau yesņa mbiwa tooni tol tizala loloz, ve itotoi mbonari ivot ighazoon. Ve nğara siriv tigde i isavia saawe to Pentekos ve ilam. Pasaa, saawe tana, uraat to votiaan vaaru poia ilaan toman tapiri tiina. \* **9:1:** Mt 16:28; Lu 9:27 \* **9:7:** Igham 40:34+; Mt 3:17; 2Pe 1:17+

<sup>9</sup> Yes tipul loloz, ve saawe tau tilaghlaagh tizila, Yesu ingalsekin zi ariaan ighe gabua tau tighita izi loloz daaba na, tivotia pa tamtamon rekia sov. Igheen toozi mon le saawe tau Tamtamon Naatu iburig pa mateegh, mako tisavia. <sup>10</sup> Tauvene gabua tana igheen to tauzi mon. Ve tigham ngar naol pa saveen tau Yesu isavia pa burigiin tooni tige: “Saveen tane, puughu mindai?”

*Mbiwa to Yesu tighasoni pa muleen to propet Iliia (Mt 17:10-13)*

<sup>11</sup> Ra mbiwa tooni tighasoni tige: “Puughu mindai ta yes ngara to tutuun tige propet Iliia aat imuul ilam imin maata, o Mesia tauu ilam?” \*

<sup>12-13</sup> Yesu iyol ghasoniin toozi ighe: “Saveen toozi tana, ene iduduun. Iliia aat ilam imin maata, ve igharaat mulin gabua naol tau isaghat ne. Ve yau nasaav payam: Iliia, i ilam wa. † Ve matamim ingal ngar tau tamtamon tigham pani na. Yes tighur patañani naol pani irau tauzi loloz itaghon saveen munğaana tau igheen pataghaan na. Ve ighe tauvene, pale mindai pa Maaron aliin tau tiboode inarui Tamtamon Naatu na? Saveen tana isaav tauvene: I aat ibaad patañani naol itaghon Maaron ngar tooni, ve yavyavuun tiina ighamu, ve tamtamon tiveleghi ve tizori.” \*

*Yesu iziir avuvu saghati pa ñeer marani ee (Mt 17:14-21; Lu 9:37-42)*

---

\* **9:11:** Mal 4:5; Mt 11:14 † **9:12-13:** Yesu isavia ñeer rughuzaanja Yoan. Pasaa, uraat siriv to Yoan, ene raraate imin uraat tau muun Iliia ighamu na. \* **9:12-13:** Mbo 22:1+; Is 53:3; Lu 1:17

<sup>14</sup> Yesu tomania mbiwa tooni tol tana timuul tila tivot to zetazña siriv, ve tighita eval tiina tila tilivutin zi. Zeran ngara siriv to tutuun tileep tomani zi paam, ve yesña tivavazorai zi pa savsaveenj. <sup>15</sup> Eval tiina tawe tighita Yesu, le tisov tirur tiina, ve rekia mon tilaan njaruini tila, ve tighamu toman lolozi poia. <sup>16</sup> Yesu ighason zi ighe: “Yamña zeran tane avazorai gham pa saa?”

<sup>17</sup> Neer ee tau ileep ila eval tiina tana lolozi na, iyol ghasoniin to Yesu ighe: “Mos puughu, avuvu saghati izeev natug tane ve ighamu aavo ivool. Tauta naghamu ilam payo leso uule. <sup>18</sup> Saawe isov tau avuvu saghati izaa pani, ene isiki izila taan, ve liivo kikikia, ambeera izizi, ve tuua ipardanjan. Tauvene naghason mbiwa tsio naghe tiziir avuvu saghati tane ighau pani. Eemon titoova, le tirao mako.”

<sup>19</sup> Yesu iloon saveenj tane, ve isaav pazi ighe: “Oyai, yam tamtamon to aazne aghur ila mako kat. Itiña takaria lepoogh wa. Tauvene naghe pa ngar tsiam ivot ve aghilaal rig. Eemon mako. Monmon yam aghamgham patanjani payau. Pale neez o namariau? Poia, agham neer marani tana ilam.” <sup>20</sup> Tauvene tighamu ila tooni. Saawe tau avuvu saghati tawe ighita Yesu, rekia mon izaa pa neer marani le itap izi taan, ve itatambul toman tuua ipardanjan, ve ambeera izizi. <sup>21</sup> Tauvene Yesu ighason taama ighe: “Patanjani tane ighamu alok wa, ma ngarig gha ighamu?”

Taama iyol aliinja ighe: “Saawe tau i kukua geeg ve ilam, gabua tane ighamghamu. <sup>22</sup> Gabua tane, poia mako. Ighe le ivaghamunia kat. Saawe naol, ighamu itaptap izala yav. Ve saawe siriv, ighamu

itap izila yaa loolo. Tauvene isaav ighe yo urao, o lolom isaghatin ghei, ve uul ghei.”

<sup>23</sup> Yesu isaav pani ighe: “Wai, mindai ta yo usaav ughe: ‘Isaav ighe yo urao, o uul ghei.’ Ene igheen ila ghuruun ila tsio mon. Tamtamon tau ighe ighur ila, ene aat gabua eta ikeeka mako.” \*

<sup>24</sup> Tauvene neer marani taama rekia mon ve itan rarai Yesu ighe: “Yau naghur ila. Eemon ghuruun ila tsiau, ene irao mako. Uul ghau lak!”

<sup>25</sup> Yesu ighita eval tiina tilaan tinjarui zi tilam, tauvene iyaon avuvu saghati tana, ve iziire ighe: “Yo tau uvaghamunia neer marani tane gha aavo ivool ve taliija ipam na, yau nasaav payo: Upuli ve ughau ula! Uzeeva muul sov!” <sup>26</sup> Isaav tauvene, ve avuvu saghati iyak saghat, ve ivatoktokin neer marani gha itap izi taan. Ra ipuli, ve ighau. Saawe tau ipuli, neer marani maata ililiit ve ivamatmaat. Tauvene eval tiina tighita ve tighe: “Waii, a imaat wa!” <sup>27</sup> Eemon Yesu ikis niima, ve iiti iburig iyooz.

<sup>28</sup> Ra Yesu imuul ila pa ruum. Yesja mbiwa tooni mon tilepleep, ve tighasoni tighe: “Puughu mindai ta yei irau niziir avuvu saghati tawe mako?”

<sup>29</sup> Yesu iyol ghasoniin toozi ighe: “Tasun, o irau taziir gabua tauvene. Eez ite paam mako.”

*Yesu isaav muul pa mateegh ve burigiin tooni  
(Mt 17:22-23; Lu 9:43-45)*

<sup>30-31</sup> Yesu tomania mbiwa tooni tipul nugh tawe, ve timbut taan sirivu to Galilaia. Yes tilaagh imin yongaan, lesa tamtamon tiwatagh laghoon toozi sov. Pasa, Yesu ighe ipaghazonai mbiwa tooni

\* **9:23:** Mk 11:23; Yo 11:40



mon pa n̄gar tau pale ivot pani. I isaav pazi ighe: “Tamtamon Naatu, pale tighuru ila koin̄a nimazi, leso tiravu imaat. Eemon mbon̄ imin tol, i aat iburig pa mateegh.” <sup>32</sup> Mbiwa tooni tiloon̄ saveen̄ tane, ve tikankaan pa puughu. Eemon tiroi pa ghasoniin̄ Yesu.

*Sei ta eeza tiina kat?  
(Mt 18:1-5; Lu 9:46-48)*

<sup>33</sup> Yes tilaagh tila tivot Kapernaum ve tilon̄ tila ruum loolo, ra Yesu ighason mbiwa tooni ighe: “Laak, saawe tau talaghlaagh taghon eez talam, yam avasavo gham pa saa?” <sup>34</sup> Yes tineneen̄ mon. Pasaa, tivasavo zi pa toozi sei ta eeza tiina iliiv zi tisov. <sup>35</sup> Tauvene Yesu mboole izi, ve ipoi mbiwa tooni san̄avul ve ru tilam, ve isaav pazi ighe: “Tamtamon tau ighe eeza imin tiina iliiv zeet̄a tisov, i aat itatan tauu eeza izi kat imin yes tau lezi ezazi mako na, ve ibees pa tamtamon tisov.” \*

<sup>36</sup> Ra Yesu igham n̄eer marani ee, ipayooze ila sosozi, ra iiti izaa ibaado, ve isaav pa mbiwa tooni muul ighe: <sup>37</sup> “Isaav ighe tamtamon eta maata in̄gal ghau, ve igham marani eta tauvene, ve iuule pa yau ezag, ene i igham ghau paam. Ve isaav ighe tamtamon eta igham ghau, ene igham zigau mako. I igham Tamañ Maaron tau imbaan̄ ghau nalam ne paam.” \*

*Tamtamon tau ighe ighur koi pait mako, ene imin etaan  
(Lu 9:49-50)*

---

\* **9:35:** Mt 20:26, 23:11; Mk 10:43+      \* **9:37:** Mt 10:40; Yo 13:20

38 Yoan iburig ve isaav pa Yesu ighe: “Paduduŋaŋ, yei nighita ŋeer ee izirziir avuvu sasaghati ila yo ezam. Eemon i itaghon ghiit pa lupuuŋ toit tane mako. Tauvene yei niŋgalsekini nighe igham tauvene sov.”

39 Eemon Yesu isaav pazi ighe: “Ai, yam agham vene sov! Pa tamtamon tau ighe igham gabua ŋgereeta tiina eta pa yau ezag, ene i irau rekia mon itoor ŋgar tooni, ve isavia saveeŋ saghati payau ne mako. \*

40 Alooŋ. Tamtamon tau ighe ighur koi pait mako, ene i imin etaan ve irau iuul ghiit. \*

41 Onoon kat, yau nasaav payam: Isaav ighe tamtamon eta maata iŋgal ighe yam tamtamon to Krisi, ve igham lemim yaa rigta ila rubruub to aghun, ene irau Maaron loolo iveegh pani mako. I aat igham tamtamon tana le atuya poia.” \*

*Tagham zetaanŋa titap pa ghuruuŋ ila toozi sov  
(Mt 18:6-9; Lu 17:1-2)*

42 Yesu isaav muul ighe: “Yes gegeu tau tighur ilam tsiau ne, isaav ighe tamtamon eta iwat toozi eta, ve ighamu itap pa ghuruuŋ ila tooni, ene i ikaria tauu wa. Tamtamon tauvene, poia to timbit maet tiina ila luua, ve tipazalia izila te loolo gha ilale.

43-44 “Isaav ighe nimam ee ighegherev ghom pa ghamuuŋ sosor, na poia to urav motini, ve usiki ilale. Onoon, yo pale umin narape. Eemon murei, yo pale uloŋ ula nugh sambam, ve uleep matam yaryaare. Pa ighe nimam ru tigheen, ene

---

\* 9:39: 1Kor 12:3    \* 9:40: Mt 12:30; Lu 11:23    \* 9:41: Mt 10:42

pale unoknok ghamuun sosoꝛ, ve saawe to Mboꝛ Murei, aat tisik ghom uzila nugh saghati tau yav ighanghan pani irau saawe. Yav tawe, irau imaat mako. \*

<sup>45-46</sup> “Ve isaav ighe aghem ee ighegherev ghom pa ghamuun sosoꝛ, na poia to urav motini, ve usiki ilale. Onoon, yo pale umin narape. Eemon murei, yo pale uloꝛ ula nugh sambam, ve uleep matam yaryaare. Ve ighe aghem ru tigheen, ene pale unoknok ghamuun sosoꝛ, ve saawe to Mboꝛ Murei, aat tisik ghom uzila nugh saghati tau yav ighanghan pani irau saawe.

<sup>47</sup> “Ve matam tauvene paam. Isaav ighe matam ee ighegherev ghom pa ghamuun sosoꝛ, na poia to upeii ve usiki ilale. Onoon, yo pale matam piind ee. Eemon murei, yo pale uloꝛ ula uleep Maaron nugh tooni. Ve ighe matam ru tigheen, ene pale unoknok ghamuun sosoꝛ, ve saawe to Mboꝛ Murei, aat tisik ghom uzila nugh saghati tau yav ighanghan pani. \*

<sup>48</sup> Motmoot to nugh tawe timatmaat mako. Tighanghan tamtamon irau saawe. Ve yav to nugh tawe paam. Irau tirav matini mako. Ighanghan irau saawe. \*

<sup>49</sup> “Yes to watoonrau tighurghur te izala watoonrau paavo, leso ingalaan ila Maaron maata. Mako yav ighani. Ngar tauvene pale ivot pa tam-

---

\* **9:43-44:** Mt 5:30    \* **9:47:** Mt 5:29    \* **9:48:** Is 66:24

tamon tisov. † \*

<sup>50</sup> “Te, §

ene gabua poia. Eemon isaav ighe tapiri isov, ve tetei muul mako, ene pale tagharaata mindai? Mako. Yam irau amin te poia, ve atotoi ngar luuma to Maaron pa tamtamon. Leso yamña avalupu gham amin eemon, ve aleep poi.” \*

## 10

*Saveeñ to ravuunñ motin vainj*

*(Mt 19:1-12; Lu 16:18)*

<sup>1</sup> Yesu iburig muul, ipul nugh tawe, ve ilaagh ila ivot taan sirivu to Yudea tau igheen ila pa yaa Yordan ziige ite. Ilepleep ta sewe, ve eval tiina timeke tila tooni muul. Tauvene i ipaghazonai zi muul pa Maaron aliinja itaghon ngar tau monmon ighamghamu na.

<sup>2</sup> Zeran tutuunja siriv tila tooni tigde titoova. Tauvene tighasoni tigde: “Mindai? Isaav ighe tamoot eta irav motin vainj tooni, ve iziir azaawa, ene iduduun pa tutuunñ toit, ma mako?”

<sup>3</sup> Yesu ighasoni zi ighe: “Tutuunñ tau Mose ighuru payam na, isaav mindai?”

<sup>4</sup> Yes tiyol aliinja tigde: “Mose iyok ighe zitamoot irau tirav motin vainj toozi. Eemon isaav ighe

---

† **9:49:** Muun, Maaron isaav pa yes Israela ighe tighur te (o sol) izala watoonrau toozi imin ilaal pa saveeñ mbuaañ tooni (Wok Pris 2:13). Yav imin ilaal pa: 1) atuya tau Maaron pale ighuru pa tamtamon pa Mbonñ Murei, 2) uraat to Avuvu Patabuyaañ, ve 3) patañani maata maata tau itoov ghuruunñ ila toit, ve igham ghiit tagharaat tauun, lesu tanjalaanñ ila Maaron maata. \* **9:49:** Ezek

43:24 § **9:50:** Paesiñ to saveeñ ziiri tane igheen ila Mt 5:13.

\* **9:50:** Mt 5:13; Lu 14:34+; Ro 12:18

tamoot eta ighe iziir azaawa, i aat ibood livaa le rau eta imin paesiin, leso ipaghazonjai zi ighe vainj toozi isov wa. Mako iziire ila.” \*

<sup>5</sup> Yesu isaav pazi muul ighe: “Saveenj tsiam tana, ene onoon. Ve Mose ibood tutuunj tau-vene payam pasaa, ngar saghati iyaryaanj kat ila lolomim. <sup>6</sup> Eemon indeenj saawe imin maata kat tau Maaron ighur sambam ve taan na, i ighur tamtamon. Ighur tamoot ve livaa. \*

<sup>7</sup> Puughu tane ta tamoot eta ighe ivai, i aat ipul taama gha tiina, ve yesuru azaawa tilup zi timin eemon. \*

<sup>8</sup> Muunj, yesuru tileep lez lez. Ve saawe to tivai, timin tamtamon eemon. Tauvene yesuru irau tileep lez lez muul mako. Pa tivalupu zi timin eemon wa. <sup>9</sup> Ve yes tau Maaron tauu ilup zi timin eemon na, tamtamon eta ivalagh zi muul sov.”

<sup>10</sup> Yesu tomania mbiwa tooni timuul tila ruum, ra tighasoni muul pa saveenj tana. <sup>11</sup> Yesu isaav pazi tauvene: “Isaav ighe tamoot eta irav motin vainj tooni, ve ivai livaa paaghu, ene imalaan pa tutuunj to vainj, ve igham sosor pa azaawa munjaana. <sup>12</sup> Ve livaa tauvene paam. Isaav ighe irav motin vainj tooni, ve ivai tamoot paaghu, ene i imalaan pa tutuunj to vainj.” \*

*Yesu ipalot yes geegeu  
(Mt 19:13-15; Lu 18:15-17)*

<sup>13</sup> Tamtamon tighamgham natuzna tila to Yesu, leso ighur niima izala pavozi ve ipalot zi. Eemon mbiwa tooni tighit zi, ve tiyaon zi. <sup>14</sup> Yesu ighita

---

\* **10:4:** Lo 24:1+; Mt 5:31    \* **10:6:** Gnp 1:27, 5:2    \* **10:7:** Gnp 2:24; Ep 5:31    \* **10:12:** Mt 5:32; 1Kor 7:10+

ngar tau tighamu na, le irau loolo mako. Tauvene isaav pazi ighe: “Ai, yam apoon eez pa geegeu sov. Apul zi tilam payau. Pa pooz to Maaron tomania nugh tooni, ene to yes tau ngar toozi imin geegeu tane. \* \*

<sup>15</sup> Yau nasaav payam kat: Isaav ighe tamtamon eta itaghon pooz to Maaron ngara imin geegeu tane mako, i aat irau ilonj ila nugh tooni ne mako.” \*

<sup>16</sup> Yesu isavsaav le isov, ra igham yes geegeu tawe, ibaad zi, ve niima izala pavozi, ve ighur poia to Maaron iza toozi.

*Kuaz tauu ee isavsaav tomania Yesu  
(Mt 19:16-30; Lu 18:18-30)*

<sup>17</sup> Yesu ighe ipaburigin laghoonj tooni muul. Eemon neer ee ilaan naruini ila, iput aaghe izi Yesu naagho, ve ighasoni ighe: “Mos puughu, yo poiam. Pale naghams mindai, leso naleep matag yaryaare le alok?” \*

<sup>18</sup> Yesu iyol ghasoniin tooni ighe: “Puughu mindai ta yo ughe yau poiag? Maaron mon ta poia. Ite paam mako. <sup>19</sup> Tutuunj ta naol ne, yo uwatagh zi wa: ‘Urav tamtamon imaat sov, ughur boog sov, uum sov, upariaan saveen karom sov, uvatombanoi tamtamon to uum gabua toozi sov, ve matam lonjonjai pa tamam gha tinam, ve utandagh pazi.’ ” \*

---

\* **10:14:** Geegeu tinumeer tamazna ve tinazna ve tileep ila sambazi. Iit paam irau tanumeer Maaron ve tileep ila i saamba. Leso tataghon pooz tooni, ve murei talonj tala nugh sambam. \* **10:14:**

1Kor 14:20; 1Pe 2:2 \* **10:15:** Mt 18:3 \* **10:17:** Mbanj 16:30

\* **10:19:** Igham 20:12+; Lo 5:16+; Ro 13:9

<sup>20</sup> Neer tawe iloonj saveenj tane, ve isaav pa Yesu muul ighe: “Wai, mos puughu, saawe tau kukuag ve ilam aazne, yau nataghoniir tutuunj tana tISOV.”

<sup>21</sup> Yesu ighita neer tana le loolo pani. Tauvene isaav pani muul ighe: “Poia. Ve njar ee ta yo ughamu soone. Ula ugholia gabua tsio tISOV, ve urei maeta pa yes mbolaanja, lesu ugham lem kuaz tauu izi nugh sambam. Le ISOV, o ulam utaghon ghau.” \*

<sup>22</sup> Neer tana iloonj saveenj tane, ve iburig, ipul Yesu ve ila toman loolo ipatanjan. Pasaa, i kuaz tauu kat.

<sup>23</sup> Ra Yesu itoor ghi maata ila pa mbiwa tooni, ve isaav pazi ighe: “Yes kuaz tauja, ipatanjan pazi kat to titaghon pooz to Maaron ve tilonj tila nugh tooni.” \*

<sup>24</sup> Mbiwa tooni tiloonj saveenj tane le tirur pani. Tauvene Yesu isaav pazi muul ighe: “Aa geegeu tsiau, ipatanjan kat pa tamtamon to titaghon pooz to Maaron ve tilonj tila nugh tooni! <sup>25</sup> Aghita. Isaav ighe kamel eta itoova to izeev ghi ilonj ila sarum puura, pale irao? Ene aat mako. Ve yes kuaz tauja tauvene paam. Isaav ighe tauzi titoova to titaghon pooz to Maaron ve tilonj tila nugh tooni, ene pale tirao mako kat.”

<sup>26</sup> Mbiwa tooni tiloonj saveenj tane le tirur tiina ve njar toozi imbool. Tauvene tighasoni tigde: “Wai, ighe tauvene, sei ta pale Maaron igham mulini ve ileep poi izi nugh tooni?”

<sup>27</sup> Yesu maata ila pazi, ve isaav tauvene: “Isaav ighe tamtamon tauzi titoova, ene aat tirao mako.

---

\* **10:21:** Mbanj 2:45, 4:32+; 1Tim 6:17+      \* **10:23:** Mk 4:19; 1Tim 6:9+

Eemon Maaron, gabua eta irau ikeeka mako. Tau-vene isaav ighe i igham mulin zi, ene pale tileep poi.”

<sup>28</sup> Yesu isaav tauvene, ve Petrus iyol aliinja ighe: “Ughita. Yei tane nipul gabua tsiei naol isov izi ileple, ve nilam nitaghon ghom.”

<sup>29</sup> Yesu iyol aliinja ighe: “Onoon kat, yau nasaav payam. Isaav ighe tamtamon eta igham ngar payau tomania vaaru poia, ve ipul ruum tooni, tonvetaz tooni, tiina taama, natja, ma uum tooni, <sup>30</sup> ene pale poia tiina to Maaron iza a tooni le iyol gabua tisov tau tamtamon tana ipul zi na irau ndinndin ee (100). Pasaa, saawe tau i ileep izi taan, Maaron pale igham le ruum, tonvetaz, natja, tiinja, ve uum katini. Eemon tamtamon pale tighur patanjani pa tamtamon tana paam pasaa, i itaghon ghau ve ivotia varug. Ve saawe to Mbon Murei ighe ivot, i pale ileep maata yaryaare le alok.

<sup>31</sup> “Eemon tamtamon katini tau aazne timunmuun, ene pale tizi tileep murei geeg. Ve yes tau aazne tileep murei geeg, ene pale anazi tila timun.” \*

*Yesu isaav muul pa mateegh ve burigiinj tooni  
(Mt 20:17-19; Lu 18:31-34)*

<sup>32</sup> Yesu tomania mbiwa tooni tilaagh taghon eez tau ila pa Yerusalem. Yesu imuun, ve yes titaghoni. Mbiwa tooni ngar toozi ivaghamgham. Ve yes tau tilaagh tomani zi na, roinj igham zi. Yesu igham mbiwa tooni sanjavul ve ru tila soghan, ra isaav pazi muul pa gabua tau pale ivot pani.

---

\* **10:31:** Mt 20:16; Lu 13:30



33 Ighe: “Aloon. Iit taghe tala pa Yerusalem tane. Tala tavot, pale tighur Tamtamon Naatu ila daaba to watoonrau tomania yes ngara to tutuun nimazi itaghon Maaron ngar tooni. Ve yes pale tipayooze pa savsaveen, ve tighur atuya pani tigde i aat imaat. Mako tighuru ila yes tau Yuda mako na nimazi. <sup>34</sup> Ve anazi tipanizaini, tinazuvu, ve tilosi pa waar tuatua, ra tiravu imaat. Eemon mbon imin tol, i pale iburig pa mateegh.”

*Yakobus ve Yoan tigde timin tintiina*  
(Mt 20:20-28)

<sup>35</sup> Yesu isavia mateegh tooni le isov, ra Zebedi natna ru, Yakobus gha Yoan, tila tigharau Yesu, ve tisaav pani tigde: “Padudunaañ, gabua ee ta yeiru lolomai pani kat. Tauvene nighe nighason ghom pani. Irau ugham payei?”

<sup>36</sup> Tauvene Yesu ighason zi ighe: “Yamru aghe yau naghm saa payam?”

<sup>37</sup> Yesuru tiyol aliina tigde: “Yei nighe murei, saawe tau uleep toman mbonarim tiina izi nugh sambam, na ugham ghei nileep ila yo zigem. Ee ileep ila pa nimam tapir, ve ite ileep ila pa nas.”

<sup>38</sup> Yesu iyol aliñazi ighe: “Gabua tau yamru aghason ghau pani na, yam awatagh patañani tooni mako. Aghita. Rubruub † tau yau aat naghun ila ne, yamru irau aghun ila paam? Ve patañani tiina tau pale igham ghau ne, yamru irau aghamu paam?” \*

---

† **10:38:** Rubruub tau Yesu isavia, ene iza to patañani tau i pale ibaado, lesu ireu sosor to tamtamon, ve itatan Maaron aatyavyav tooni. \* **10:38:** Mk 14:36; Lu 12:50

<sup>39</sup> Yesuru tiyol aliinja tigde: “Vee, yeiru irau nighun ila.”

Tauvene Yesu isaav pazi muul ighe: “Onoon, rubruub tau yau aat naghun ila, yamru pale aghun ila paam. Ve patanani tau yau aat naghamu, ene pale igham yamru paam. \*

<sup>40</sup> Eemon gabua tau yamru aghason ghau pani na, yau nanjini mako. Ene igheen to Tamañ Maaron. Sei ta pale ileep pa nimag tapir, ve sei ta pale ileep pa nas, ene i tauu ighur zi pataghaan wa.”

<sup>41</sup> Zetazña sanjavul tiloon Jakobus yesuru Yoan saveen toozi, le irau lolozi mako. <sup>42</sup> Tauvene Yesu ipoi zi tilam, ve isaav pazi ighe: “Ngar to nugh nugh tau Yuda mako na, yam awataghi wa. Yes daaba tau tinjinjin zi na, tipapait tauzi ezazi, ve titatan yes tau tileep ila sambazi. Ve tamtamon toozi siriv tau ezazi tintiina na, titaghon ngar raraate mon. Saawe naol, titotoi tapirizi pa yes tau tileep ila sambazi na, ve titatan zi. \*

<sup>43</sup> Eemon ngar tauvene igheen tsiam sov. Isaav ighe tsiam eta ighe eeza imin tiina ila yam so-somim, na i aat itatan tauu eeza, ve imin besoonja payam. \*

<sup>44</sup> Ve isaav ighe tsiam eta ighe imuun pa yam asov, na i aat itatan tauu eeza izi kat le imin besoonja sorok pa tamtamon tisov. \*

<sup>45</sup> Leso itaghon Tamtamon Naatu ngar tooni. Pa i ilam to tamtamon tibeas pani ne mako. I ilam imin besoonja to iuul tamtamon, ve iyoki tauu gha

---

\* **10:39:** Mbanj 12:2; Pil 3:10; Syg 1:9 \* **10:42:** Lu 22:25+

\* **10:43:** Mt 23:11; Mk 9:35; Lu 9:48 \* **10:44:** 1Pe 5:3

imaat pa tamtamon katini. Leso ighol atuya to sosor toozi, ve ipas zi pa saghati tapiri.” \*

*Yesu igharaat neer maata kumkuuma ee igharau Yeriko*

*(Mt 20:29-34; Lu 18:35-43)*

<sup>46</sup> Yesu tomania mbiwa tooni tila tivot nugh Yeriko. Ra tisakia laghoon toozi muul, ve yesna eval tiina tipul nugh, ve tilaagh tila le tizaa to neer maata kumkuuma ee, eeza Bartimeus. I Timeus naatu. Mboole izi eez ziige ve isunsun tamtamon pa le gabua. <sup>47</sup> I iloon tigde neer tau ilam ne, i Yesu to Nasaret. Tauvene iboob aliina tiina ighe: “Aa Yesu, David Naatu, lolom isaghatin ghau ve uul ghau lak!”

<sup>48</sup> Tamtamon katini tiloona, ve tiyaoni tigde ineenen. Eemon mako. I itan rarai Yesu muul toman aliina tiina kat ighe: “O David Naatu, lolom raa, isaghatin ghau ve uul ghau lak!”

<sup>49</sup> Tauvene Yesu iyooz, ve isaav ila pa tamtamon siriv ighe: “Asaav pani ilam.”

Tauvene tipoi maata kumkuuma tawe tigde: “Aa, lolom poia, ve uburig. Pa i ipoi ghom ighe ula tooni.” <sup>50</sup> Neer tana itir nonoghiina tooni malaua izi, ve iburig gha ila to Yesu. <sup>51</sup> Ila ivot, ra Yesu ighasoni ighe: “Aiyo, uge naghama mindai payo?”

Maata kumkuuma tana iyol aliina ighe: “Aa mos puughu, yau naghe yo ugharaat matag. Leso naghita nugh.”

<sup>52</sup> Tauvene Yesu isaav pani ighe: “Ula lak! Ghu-ruun ila tsio, tauta iuul ghom gha matam poia wa.” Reikia mon neer tana maata poia gha ighita nugh.

\* **10:45:** Yo 13:14; Pil 2:7; 1Tim 2:5+

Ra itaghon Yesu ve yesna tilaagh taghon eez gha tila.\*

## 11

### *Yesu izala pa Yerusalem*

*(Mt 21:1-11; Lu 19:28-40; Yo 12:12-19)*

<sup>1</sup> Yesu tomania mbiwa tooni tilaagh tila le tigharau Yerusalem, ve tivot nugh ru, Betpage ve Betania, tau tighen ila loloz Oliv ziige. Ra Yesu imbaan mbiwa tooni ru ighe: <sup>2</sup> “Yamru amuun azala nugh tawe. Ala avot, pale aghita donki paaghu ee tau timbitu iyozyooz. Neer eta mboole izala paavo pai eta soone. Apoola, ve aghamu izilam. <sup>3</sup> Isaav ighe tamtamon eta ighason gham ighe: ‘Puughu mindai ta yamru agham tauvene?’ o asaav pani aghe: ‘Tiina tsiei le uraat pani. I pale rekia mon ve ipamuule ilat.’ ”

<sup>4</sup> Tauvene yesuru timuun tila tivot nugh tawe, ve tighita donki paaghu ee iyozyooz. Donki tawe, timbitu ila eez ziige igharau ataman to ruum ee. Yesuru tipoola, <sup>5</sup> ve zeran siriv tau tiyozyooz ta sewe tighason zi tigde: “Ai, yamru agham saa? Puughu mindai ta apool sorokin donki tana?”

<sup>6</sup> Yesuru tiyol alinazi imin tau Yesu isaav pazi. Ra zeran tawe tiyokia donki tana pazi, <sup>7</sup> ve yesuru tighamu, ve timuul tizila pa Yesu. Tila tivot tooni, ra tizuum nonoghiina toozi to ngoaan izi, titir zi izala donki paavo, ve Yesu izala ve mboole izi.

<sup>8</sup> Ra eval tiina tau tilaagh tomani zi na, tizavar nonoghiina toozi to ngoaan taghon eez to tipakuru. Ve tamtamon siriv tila timbut gabua imin tuum

---

\* **10:52:** Mt 9:22; Mk 5:34

raua itaghon eez ziige, ve tigham zi tilam tisik zi taghon eez paam. <sup>9</sup> Ve tamtamon siriv timuun pa Yesu, ve siriv tilaagh murei, ve tipaiti toman alinazi tiina tigde:

“Hosana! \*

Neer tane ilam pa Neer Tiina eeza.

Poia to Maaron aat iza a tooni ve ipaloti! \*

<sup>10</sup> Tamtamon tau aazne ilam ne, pale imin kinik, ve igham pooz imin muun timbuun David ighamu.

Poia to Maaron aat iza a tooni ve ipaloti.

Hosana! Tapait Maaron tau ileep saanja le saanja kat na eeza!”

<sup>11</sup> Yesu ila ivot Yerusalem, ra ilon ila sirsiir to Rumei Tiina loolo. Iyozyooz ta sewe, ve maata ilala pa gabua, ve ighita ngar naol tau tamtamon tighamgham zi ila rumei loolo. Eemon igharau ighe mbon izi. Tauvene yesnja mbiwa tooni sanjavul ve ru tipul Yerusalem, ve timuul tila pa nugh Betania.

*Yesu isaav ve ai fik igorgor*

*(Mt 21:18-19)*

<sup>12</sup> Mbon nughizau, ra Yesu tomania mbiwa tooni tiburig gha tipul nugh Betania, ve tigde timuul tila pa Yerusalem. Tilaghaagh taghon eez tila, ve Yesu iyamaan ghi ighe i pitoola. <sup>13</sup> Maata ila le ighita ai fik ee iyooz soghan. Tauvene injaruini ila ighe igham anoonja siriv gha ighan. Eemon ila le ighita ai tawe le anoonja eta mako. Raua mon.

---

\* **11:9:** ‘Hosana’, ene saveen ziiri ee to yes Israela. Puughu tauvene: ‘ugham mulin’ o ‘uul.’ Isaav ighe tiyoor neer eta eeza, ene tibobai saveen tane to tipakuru. \* **11:9:** Mbo 118:25+

Pasaa, saawe tana, ene saawe to ai fik tiyanooñ soone. <sup>14</sup> Tauvene isaav pa ai tana ighe: “Aazne ve ila, yo aat anoñam muul to tamtamon tighani ne mako.” \*

Yesu isavia saveeñ tane, ve mbiwa tooni tilooña paam.

*Yesu iziir tamtamon to raukoliin tighau pa Rumei Tiina*

*(Mt 21:12-17; Lu 19:45-48; Yo 2:13-22)*

<sup>15</sup> Yesu tomania mbiwa tooni tila tivot Yerusalem, ra Yesu ilonñ ila sirsir to Rumei Tiina loolo, le ighita tamtamon tiraraukol ta sewe. Tauvene ighe iziir zi tighau tivot tila pa muuri. I itoor boor to yes zeran to paravoliaañ maet, tomania pañ to yes tau tiraraukol pa man mbuun na, le saveeñ mariñ toozi iparñgiriiz izi taan. <sup>16</sup> Ve yes tau tibadbaad gabua toozi, ve tilala tilamlam ila sirsir loolo to Rumei Tiina na, i iñgalsekin zi ighe tigham tauvene muul sov. <sup>17</sup> Ra ipaghazoñai zi pa Maaron aliña ighe: “Yam awatagh mako? Maaron aliña tau tiboode na isaav ighe:

‘Pale tiwaat rumei tsiau tigde ‘suñuunñ niia to nughmariñ.’

Eemon yam aghamu imin nugh tau umbuunña tiyoñyooñ ila.’ ” \*

<sup>18</sup> Yes daaba to watoonrau tomania yes ngara to tutuunñ tilooñ saveeñ tane, ve tiburig gha tiil eez pa ravuunñ Yesu imaat. Pasaa, eval tiina tirur pa saveeñ tooni ve titaghoni wa. Tauvene yes daaba tiroi pani.

---

\* **11:14:** Lu 13:6      \* **11:17:** Is 56:7; Yer 7:11

19 Ravrav izi, ra Yesu tomania mbiwa tooni tipul Yerusalem, ve tivot tila.

*Ghuruuŋ ila toit, tapiri tiina*

*(Mt 21:20-22)*

20 Nughizau, ra Yesu tomania mbiwa tooni tiburig gha tilaagh taghon eez muul tila. Tila le tighita ai fik tau Yesu isavia saveeŋ pataŋani iŋaruini na, igorgor izala ta unduuva ve izila waria paam. 21 Tauvene Petrus maata iŋgal Yesu aliija, ve isaav pani ighe: “Paduduŋaŋ, ughita! Ai fik tau noor usavia saveeŋ pataŋani iŋaruini na, igorgor wa!”

22-23 Yesu iyol Petrus aliija, ve isaav pazi ighe: “Yam irau aghur ila to Maaron. Yau nasaav payam kat: Isaav ighe tamtamon eta isaav pa loloz tane ighe: ‘Uburig, ve usik taum ula te.’ Ve ighe loolo ru mako, ve ighur ila ighe saveeŋ tooni pale ighur anooŋa, ene pale Maaron igham gabua tana ivot.  
\*

24 Tauvene yau nasaav payam. Isaav ighe yam aghason Maaron pa gabua eta, ve aghur ila aghe i pale igham gabua tana ivot, i aat ighamu ivot payam.\*

25 “Isaav ighe yam ayooz pa suŋuun, ve lemim pataŋani tomania etamim eta, na apul sosor tooni tana. Le isov o asuŋ. Leso Tamamim tau ileep sambam we, ireu sosor tsiam paam.\*

26 [Eemon isaav ighe yam apul sosor to zeetmimŋa mako, ene aat sosor tsiam paam, Tamamim tau ileep sambam we, ireua mako.]”

---

\* **11:22-23:** Mt 17:20; Lu 17:6      \* **11:24:** Yo 14:13; Yems 1:5+

\* **11:25:** Mt 5:23, 6:14+; Kol 3:13

*Yes daaba tighason Yesu pa sei ta ighuru pa uraat tooni*

*(Mt 21:23-27; Lu 20:1-8)*

<sup>27</sup> Yesu tomania mbiwa tooni tila tivot Yerusalem muul, ve Yesu ilonj ila sirsiir to Rumei Tiina loolo, ve ilaghlaagh ta sewe. Yes daaba to watoonrau tomania ngara siriv to tutuunj ve pooza siriv tilup zi ve tila tivot tooni, ve tighasoni tigde: <sup>28</sup> “Laak, uraat tau yo ughamghamu na, yo ezam pani mindai? Ve sei kat ta ighur ghom pa uraat tane?” \*

<sup>29</sup> Yesu iyol aliñazi ighe: “Ghasoniinj tsiam poia. Eemon yau leg ghasoniinj ee payam paam. Isaav ighe ayol ghasoniinj tsiau, ene aat yau nayol tsiam paam, ve navotia puughu ta yau ezag pa uraat tsiau. <sup>30</sup> Aiyo, asaav payau. Yoan tau muunj irurughuuz tamtamon na, uraat tooni puughu mindai? I itaghon ngar to nugh sambam, ma itaghon ngar to tamtamon?”

<sup>31</sup> Yes tiyol aliñja rekia mako. Tivasavo zi tigde: “Wai, ene pale tasaav mindai? Ighe tasaav taghe: ‘Yoan itaghon ngar to nugh sambam,’ i pale isaav pait: ‘Ighe tauvene, puughu mindai ta yam aghur ila saveen tooni mako?’ <sup>32-33</sup> Ve ighe tasaav taghe: ‘Yoan itaghon ngar to tamtamon,’ pale poia?” Tisaav tauvene pasaa, tamtamon tisov tighur ila tigde Yoan i propet tauu. Tauvene yes tiroi, ve tiyol ghasoniinj to Yesu tigde: “Ti, yei nikankaan pani.”

Tauta Yesu aana isaav pazi: “Ighe tauvene, yau paam, aat irau nayol ghasoniinj tsiam, ve navotia puughu tau yau ezag pa uraat tsiau tane ne mako.”

\* **11:28:** Yo 2:18; Mbanj 4:7



# 12

*Saveeṅ palelaaṅ to uraata sasaghatizi tau tingingin uum vaen*

*(Mt 21:33-46; Lu 20:9-19)*

<sup>1</sup> Yesu isaav muul pa yes daaba to yes Yuda ila saveeṅ palelaaṅ ighe: “Pai ee, ṅeer ee igharaat taan tooni ve ivazogh vaen ila. \*

Mako ikau olol livutini, ve itai puura ee imin nugh to pisonṅ vaen, ve irau balbaal aaghe malaua. Leso yes uraata tileep izala saaṅa, ve matazi ilala pa uum vaen ve tingingini. I igharaat gabua naol le isov, ra ipul uum vaen tooni ila uraata siriv nimazi. Leso tigham uratoini, ve saawe to yaunṅ vaen anooṅa, mako tivalaghi gha sirivu imin i le, ve sirivu imin yes lezi. I igharaat saveeṅ tomani zi le isov, ra iburig, ipul nugh tooni, ve ila ileep malau izi nugh ite. \*

<sup>2</sup> “Ileep ta sewe le saawe to yaunṅ vaen anooṅa ivot, ra imbaaṅ besooṅa tooni ee ila to yes uraata tawe. Leso igig zi, ve igham vaen anooṅa siriv tau tighuru pa uum taunṅ na. <sup>3</sup> Eemon saawe tau besooṅa tana ila peria toozi, tikisi ve tilosi. Ra tiziire niima ṅginaaṅa, gha imuul ila. <sup>4</sup> Tauvene uum taunṅ imbaaṅ besooṅa tooni ite ila. Eemon i paam, tiravu izala daaba, ve tipamayaṅini. <sup>5</sup> Ra uum taunṅ imbaaṅ besooṅa tooni ite imin tol aana ila. I ila ivot toozi, ve tiravu imaat. Ve besooṅa tooni siriv, tauvene paam. Tirav siriv le naghozi isaghat, ve siriv, tirav zi timatmaat.

---

\* **12:1:** Paesiṅ to saveeṅ ziiri tane igheen ila Mt 21:33. \* **12:1:** Mbo 80:8+; Is 5:1+

<sup>6</sup> “Besoonja tooni tisov titoova le mako, ve njeer eemon ta ilepleep. Ene i tauu naatu tau i loolo igheen tooni kat. Tauvene imbaan naatu tana ila. Pasaa, igham ngar tauvene: ‘Ighe taug natug ila, ene aat tiroron pani ve tiloonj aliinja.’ <sup>7</sup> Eemon saawe tau yes uraata tana tighita naatu ilaghlaagh soghan gha ilam, tivasavo zi tigde: ‘Ou, aghita! Ewe tiina toit naatu, tauta ilam we. Murei, i pale ighamuur gabua naol isov to taama. Tala taravu imaat. Leso gabua tau i eeza pani ne, taghamu imin leen!’ \*

<sup>8</sup> Tauvene tila gha tikisi, ve tiravu imaat. Ra tisir paata iza, ve tila tisiki ila pa muuri.” \*

<sup>9</sup> Yesu isavia saveenj tane le isov, ra ighason zi ighe: “Yam agham ngar mindai? Pale uum vaen tauja igham mindai pa yes uraata tawe? I pale ilam ve irav zi tisov timataar, ve ighur uum vaen tooni ila tamtamon siriv nimazi, lesu tingini.” \*

<sup>10</sup> Ra Yesu isaav pazi muul ighe: “Maaron aliinja ziiri ee tau tiboode na, yam awaato, ma mako? Saveenj tawe isaav ighe:

‘Maet tau yes to raonj ruum matazi veleghini, ve tisiki ilale, tauta imin puughu pa ruum iyooz ve ipaloti. Leso ruum iyooz ariaan izala paavo.

<sup>11</sup> Maaron tauu igham ngar tane ivot.

Ve yei nighita imin gabua ngereeta ee ila mata-mai.’ ” \*

<sup>12</sup> Yes daaba tiloonj saveenj palelaan tane, ve tighilaal tigde Yesu isavia saveenj tane injarui zi.

---

\* **12:7:** Mt 27:18    \* **12:8:** Hib 13:12    \* **12:9:** Mbanj 13:46,  
28:28    \* **12:11:** Mbo 118:22+

Tauvene tigde tikisi pataghaan. Eemon tiroi pa eval tiina, tauta tipuli, ve tighau tila.

*Ghasoniin to sikiin takes ila pa kinik tiina to Rom  
(Mt 22:15-22; Lu 20:20-26)*

<sup>13</sup> Murei ra, daaba to yes Yuda timbaan zeran tutuunja tomania Erod ziijeera siriv tila to Yesu. Yes tigde titombaana pa savsaveen, ve ighe isik aliinja eta isosor, mako imin puughu pani to tipayooze pa savsaveen. <sup>14</sup> Tauvene tila tivot tooni, ve tigham saveen ngoreen pani tigde: “Mos puughu, yei niwatagh: Yo neer to saveen onoon mon. Isaav ighe tamtamon ezazi tintiina, ma lezi ezazi mako, na yo ugham ngar pa gabua tauvene mako. Usasavia ngar raraate mon pa tamtamon tisoov, ve usavsav ghazoon ila matazi. Ve isaav ighe upaghazonai tamtamon pa eez to Maaron, na saveen tsio isov, ene onoon mon. Tauvene usaav ghazoon payei. Isaav ighe iit Yuda tasik takes ila pa kinik tiina to Rom, pale iduduun pa tutuun toit, ma mako? Tasik, ma ileple?”

<sup>15</sup> Eemon Yesu iwatagh karom toozi wa. Tauvene isaav pazi ighe: “Puughu mindai ta yam aghe atoov ghau? Maet tau tasiksiki pa takes na, agham eta ilam naghita.” <sup>16</sup> Tauvene tigham maet denari ee ila tooni, ve ighason zi ighe: “Laak, sei anunu ve eeza tane?”

Yes tiyol ghasoniin tooni tigde: “Ena kinik tiina to Rom.”

<sup>17</sup> Yesu isaav pazi muul ighe: “Tauta ena. Ighe gabua to kinik tiina to Rom, na aghamu imuul ila

pa i tauu. Ve gabua to Maaron, o apamuule ila pa Maaron.” †

Yes tiloonj saveenj tooni tane le tirur pani. \*

*Ghasoniinj pa burigiinj to yes mateegha*  
(Mt 22:23-33; Lu 20:27-40)

<sup>18-19</sup> Yes Sadusi tisavsaav tigde yes mateegha irau tiburig mako. Tauvene Sadusi siriv tila to Yesu, ve tighasoni tigde: “Mos puughu, muunj Mose ibood tutuunj pait tauvene: Ige neer eta ivai, ve yesuru azaawa lezi natuzi eta mako, ve tamoot imaat, ene aat taazi ivai naar tooni. Leso livaa ipoop, ve natuzi tana iyol taama olman tau imaat na, ve iyooz pa gabua tooni. \*

<sup>20</sup> “Laak, saawe ee, tonjvetaz liim ve ru tilepleep. Neer aidaaba ivai, eemon le naatu mako, ve imaat.

<sup>21</sup> Tauvene taazi tau itaghoni na, igham naar tawe ve ivaii. Eemon taazi tawe paam, le naatu mako, ve imaat. Ra tazizi ite tau imin tol na, ngar raraate ivot pani paam. Le naatu mako, ve imaat.

<sup>22</sup> Tighamgham tauvene le yes liim ve ru tivai livaa eemon tana, ve timatmaat le tisov. Ve lezi natuznja mako. Murei ra, naar tana paam, aana imaat. <sup>23</sup> Laak, saawe to Maaron ighe ipaburigin yes mateegha, ene pale livaa tawe imin sei kat azaawa? Pa yes liim ve ru ta tisov tivaii.”

<sup>24</sup> Yesu iyol alinjazi ighe: “Oyai, yam tane awatagh Maaron tapiri ve saveenj tooni rigta mako. Tauta ngar tsiam ikau. <sup>25</sup> Saawe to Mbonj Murei, ve Maaron ighe ipaburigin yes mateegha,

† **12:17:** Paesiinj to saveenj ziiri tane igheen ila Mt 22:21.

\* **12:17:** Gnp 1:27; Ro 13:7; 1Pe 2:17 \* **12:18-19:** Lo 25:5; Mbanj 23:8

ene tamtamon irau tivai muul mako. Lepoghazi pale imin yes anjela tau tileep izi nugh sambam. \*  
 26-27 Aiyo, yau naghe naghason gham pa burigiin to yes mateegha. Mindai, saveen ziiri ee tau Mose iboode na, isavia saawe tau Maaron ivot tooni imin yav ighanghan ila ai marani. Yam awaat saveen tawe, ma mako? Saawe tana, Maaron isaav pani ighe:

‘Yau Maaron to Abaram, Maaron to Isak, ve Maaron to Yakop.’ \*

“Maaron, i Maaron to yes mateegha mako. I Maaron to yes tau tileep matazi yaryaare. Tau-vene ngar tsiam isapir kat.” †

*Tutuun sindei ta tiina kat iliiv tutuun tiso?*  
 (Mt 22:34-40; Lu 10:25-28)

28 Neer ngara ee to tutuun ilam ve iloon Yesu tomania yes Sadusi tivazorai zi pa savsaveen. I iloon saveen to Yesu, ve ighita ighe Yesu iyol dudunai ghasoniin toozi. Tauvene aana ighason Yesu ighe: “Tutuun sindei ta tiina kat iliiv tutuun tiso?”

29 Yesu iyol ghasoniin tooni ighe: “Tutuun tau tiina kat iliiv tutuun tiso, ene vene:

‘O yam Israela aloon! Tiina toit Maaron, i mon ta Maaron tauu.’ \*

30 Tauvene lolom pa Tiina tsio Maaron. Ughur lolom tomania ngar tsio ve tapirim isov ila pani.’ \*

31 “Ve tutuun tiina ite tau imin ru pani, ene vene:

---

\* 12:25: 1Kor 15:42-53      \* 12:26-27: Igham 3:6; Mbanj 7:32;  
 Hib 11:16      † 12:26-27: Paesiin to saveen ziiri tane igheen ila Mt  
 22:32.      \* 12:29: Lo 6:4+      \* 12:30: Lo 10:12+

‘Lolom pa tamtamon ve ugham poghani zi,  
imin lolom pa taum.’ \*

Tutuunj eta iliiv tutuun ru tane mako.” \*

<sup>32</sup> Neer tawe iloonj saveenj tane, ve isaav pa Yesu ighe: “Mos puughu, saveenj tsio, ene iduduunj kat. Saveenj tau usavia, ene onoon mon. Pasaa, Neer Tiina mon ta Maaron tauu. Maaron ite paam mako.” \*

<sup>33</sup> Tauvene isaav ighe iit taghur loloon tomania njar toit ve tapiriin isov ila pani, ve taghur loloon pa tamtamon ve tagham poghani zi imin loloon pa tauun, ene gabua tiina kat. Iliiv gabua naol isov tau taghur zi izala artaal leso yav ighan dodolin zi, tomania watoonjrau siriv tau taghamgham zi ne.” \*

<sup>34</sup> Yesu ighita ighe neer tana iyol saveenj toman njar poia, tauvene isaav pani ighe: “Yo uleep malau pa pooz to Maaron mako.” Saawe tana ve ila, tamtamon tighason Yesu pa saveenj eta muul mako. Pasaa, tiroi pa saveenj tooni.

*Isaav ighe Mesia ivot ila to kinik David, pale eeza irau iliiv David mindai?*

*(Mt 22:41-46; Lu 20:41-44)*

<sup>35</sup> Yesu ipaghazonjai tamtamon pa Maaron aliinja ila sirsiiir to Rumei Tiina loolo, ve ighason zi ighe: “Laak, puughu mindai ta yes ngara to tutuunj tige Mesia pale ivot ila to kinik David paaghu tooni?”

<sup>36</sup> Pa muun, Avuvu Patabuyaanj ipaburigin David, ve isaav tauvene:  
‘Maaron isaav pa Tiina tsiau ighe:

---

\* **12:31:** Wkp 19:18    \* **12:31:** Ga 5:14; Yems 2:8    \* **12:32:** Lo 4:35, 39    \* **12:33:** Mbo 40:6-8, 51:16-17; Mt 9:13

“Ulam mbolem izi ila pa nimag tapir,  
le irau natatan koiamña ve tapirizi isov kat, ve  
uvaghaaz zi ila aghem saamba.” ’ \*

<sup>37</sup> “Aghita. David tau iwaat Mesia ighaze ‘tiina toni.’ Eemoghon Mesia, ye siñ to David. Mbeb tonene, ngara vena?” §

Eval tiina tau tilonloon Yesu saveen tooni, tintinizi ve lolozi poia kat.

*Yesu iveveen tamtamon pa ngar pakuruun to yes ngara to tutuun*

*(Mt 23:1-36; Lu 20:45-47)*

<sup>38</sup> Yesu ipaghazonai tamtamon pa Maaron aliña, ve isaav pazi ighe: “Matamim imomoos pa yes zeran ngara to tutuun! Yes tigde tinonogh zi pa nonoghiña toozi mamalaua, ve tilaghlaagh taghon maaran aate. Leso tamtamon tighit zi, ve tisavia saveen popoia pazi imin pakuruun zi. <sup>39</sup> Ve isaav ighe tilon tila rumei, ma tila pa ghanghaniin, ene tigde le tileep ila pañ popoiazi tau tighur zi pa yes tau ezazi tintiina na. <sup>40</sup> Yes titotombaan zinaara ve tigham ruum toozi tomania saveen mariñ toozi imin lezi. Ve tiyotyoot sunuun toozi le malaua kat. Leso tamtamon tighit zi tigde yes zeran patabuyaana. Tauvene atuya tau murei pale iza toozi, ene tiina le tiina kat.”

*Paitoon to naar ee*

*(Lu 21:1-4)*

---

\* **12:36:** Mbo 110:1; Mban 2:34+; 1Kor 15:25; Hib 1:13    § **12:37:** Paesiin to saveen ziiri tane igheen ila Mt 22:45.

41 Yesu mboole izi Rumei Tiina naagho igharau nugh tau tamtamon tighurghur paitoonj toozi ila na,\*  
 ve maata ilala pa eval tiina tau tila pa ghuruun paitoonj toozi. Kuaz tauja katini tila, ve tighur maet tintiina ila. 42 Ra naar mbolaanja ee paam, aana ila ve ighur maet sinjsinai geegeu ru ila. 43 Yesu ighita gabua tana, ve ipoi mbiwa tooni tilam, ve isaav pazi ighe: “Yau nasaav payam kat. Naar tawe, i livaa mbolaanja. Eemon maet tau i ighuru we, ene iliiv maet tau tamtamon tisov tighuru na. 44 Pasaa, yes tisov lezi maet tiina ighengheen, ve tighur ngiira mon. Ve naar tawe, mbolaanj ighamu. Eemon maet tooni rig to injini pa lepoogh tooni, tauta ighuru isov ila.” \*

## 13

*Yesu isaav pa rewaanj Rumei Tiina to Yerusalem  
 (Mt 24:1-2; Lu 21:5-6)*

1 Yesu ipul Rumei Tiina, ve ivot ila muuri, ra mbiwa tooni ee isaav pani ighe: “Padudunjaan, ughita. Tirau katin rumei poia ee we pa maet popoia maata maata! Ve ruum siriv tau tiyooz tigharau we paam, paghunazi kat.”

2 Eemon Yesu isaav pani ighe: “Aazne, ughita ruum tintiina tau tiyoozyooz we? Yau nasaav payo: Murei pale tireu mbirisai zi tisov tizi. Irau tipul maet eta igheen izala maet ite paavo mako.” \*

---

\* **12:41:** Yes Yuda tigharaat gabua imin makau zoonja mamalaua sanjavul ve tol (13), ve tipayooz zi ila Rumei Tiina naagho, leso tamtamon tighur paitoonj toozi ilonj ila. \* **12:44:** 2Kor 8:1, 12

\* **13:2:** Lu 19:44



*Pataɗani naol pale tivot muuŋ, mako tireu Rumei Tiina izi*

*(Mt 10:17-22, 24:3-14; Lu 21:7-19)*

<sup>3</sup> Yes tilaagh tizala loloz Oliv, ra Yesu mboole izi ta sewe, ve maata ila pa Rumei Tiina tau iyozyooz we. Petrus, Yakobus, Yoan, ve Andreas tila tooni, ve yes mon tileep tomania, ra tisaav pani tigde:

<sup>4</sup> “Usaav ghazonɗa payei. Saveeŋ tau usavia pa rewaan Rumei Tiina na, ɗeez o gabua tana ivot? Ve isaav ighe saawe to gabua naol isov tana igharau ighe ivot, pale saa gabua imin ilaal pani?”

<sup>5</sup> Yesu isaav pazi ighe: “Matamim imomoos poi pa taumim. Mako pale tamtamon eta igherev gham, ve apul eez tsiau. \*

<sup>6</sup> Pasaa, murei, tamtamon naol pale tilam ve tiwaat sorokin ezag, ve tigde: ‘Ñeer tau yam asasaɗani, ene yau taug tane.’ Ve tamtamon katini pale tighur ila karom toozi tawe, ve tipul eez tsiau. \*

<sup>7</sup> “Isaav ighe yam aloon malmal tintiina varuzi, ma aloon saveeŋ yaghur tigde malmal tintiina pale tivot, na asaɗeeŋ sov. Pa gabua tauvene aat ivot itaghon Maaron ɗgar tooni. Eemon taan saawe, ene soone. <sup>8</sup> Tauvene nugh tintiina pale tigham malmal tomania nugh tintiina siriv. Ve kinik siriv pale tigham malmal tomania kinik to nugh siriv. Ve yogyoog pale itok taan siriv, ve pitool ivot izi nugh siriv. Pataɗani naol tana, ene imin yavyavuun tau zilivaa tiyamaana imin

---

\* **13:5:** Ep 4:14; 2Tes 2:1+; 1Yo 4:1

\* **13:6:** Mbaŋ 5:36+; 1Yo 2:18

maata. Le isov, o tipoop. \*

*Tamtamon pale tighur patanjani pa yes tau titaghon Yesu*

<sup>9</sup> “Matamim imomoos poi pa taumim. Pa yes Yuda pale tipayooz gham pa savsaveeņ ila daaba toozi naghozi, ve tilos gham ilon ila rumei toozi. \* Ve nugh nugh tau tighur koi payau na, pale tipayooz gham pa savsaveeņ paam ila yes pooza to taan ve kinik naghozi pasaa, yam ataghon ghau. Gabua tau ivot payam pa saawe tana, ene pale imin eez payam to avotia varug ve apariaaņ saveeņ tsiau ila yes pooza tawe naghozi. \*

<sup>10</sup> Ve vaaru poia, aat tivotia irau nughmarin itaghon Maaron ngar tooni. Le isov o taan saawe ivot.

<sup>11</sup> “Isaav ighe tikis gham ve tighur gham ila yes daaba nimazi pa savsaveeņ, na lolomim bubu ve ail ngar, ma saveeņ to asavia pazi sov. Saawe tau tipayooz gham pa savsaveeņ, saa ngar tau ighe ivot payam na, asavia mon. Pa Maaron tauu pale ipaghazonjai gham pa saa saveeņ tau i ighe yam asavia. Tauvene yam pale asaav itaghon taumim ngar tsiam mako. Ene pale Avuvu Patabuyaāņ ivotia aliiņa ila yam avomim. \*

<sup>12</sup> “Saawe tana ighe ivot, tamtamon pale tighur tonvetaz toozi ila yes daaba nimazi, leso tirav zi timaat. Ve zolman pale tigham ngar raraate mon pa natuzņa. Ve geegeu pale tighur koi pa tamazņa

---

\* **13:8:** Yes Yuda tighur ila tauvene: Patanjani naol aat tivot itaghon Maaron ngar tooni. Le isov, o Mesia ilam ve igham lepoogh poia ivot. \* **13:9:** Mbaņ 4:1, 5:17, 22:30+ \* **13:9:** Mbaņ 16:19, 25:23+ \* **13:11:** Mt 10:19-20; Lu 12:11+

ve tinazña paam, ve tighur zi tila yes daaba ni-mazi, lesu tirav zi timaat.

<sup>13</sup> Tamtamon tisov pale tighur koi payam. Pasaa, yam avotia yau ezag, ve ataghon ghau. Eemon tamtamon tau ighe iyooz ariaañ ve ikis ghuruun ila tooni tunja le irau saawe tooni isov, ene aat Maaron igham mulini ve ileep poi.” \*

*Patañani tiina kat pale ivot pa Yerusalem*

*(Mt 24:15-28; Lu 21:20-24)*

<sup>14</sup> Yesu isaav muul ighe: “Murei, yam pale aghita tamtamon tipayooz gabua saghati kat ilon ila nugh patabuyaañ to tivaghamunia. Nugh tawe, gabua tauvene irau ilon ila mako. Eemon pale tipayooze izaa iyooz ta sewe, mako tipul nugh tawe ileple. (Yo sei tau uwaat saveen tane, na ugham ngar pani poi.) Isaav ighe gabua tana ivot, tamtamon tau tileep izi taan sirivu to Yudea na, yes aat rekia mon tighawaar tizala pa loloz. \*

<sup>15</sup> Tauvene isaav ighe ñeer eta ilepleep ila nugh to lepoogh ta ruum paavo we, † ene irau izila muul ruum loolo to igham gabua tooni eta ne mako. Izi le ighau malmali ila. \*

<sup>16</sup> Ve isaav ighe tamtamon eta ighamgham uraat ila uum, ve patañani tana ivot, ene i paam. Irau imuul ila igham nonoghiinja tooni to ngoaan mako. Ighau mon gha ila. <sup>17</sup> Saawe tana ighe ivot, zilivaa tau apozi, ve yes payamyamña, ene tikaria tauzi wa. Pasaa, ipatañan pazi pa ghaon. <sup>18</sup> Tauvene

---

\* **13:13:** Yo 15:18, 20; Syg 2:7, 11, 3:5    \* **13:14:** Dan 9:27, 11:31, 12:11    † **13:15:** Yes Yuda, ruum toozi pavozi babaanja. Tauvene tirourou ta sewe imin iit tarourou ila patar.    \* **13:15:** Lu 17:31

yam asuñ Maaron. Leso ighur saawe to patañani tana ila saawe to nugh yauna sov, ve ighur sooso payam to aghau. <sup>19</sup> Pa patañani to saawe tana, pale tiina le tiina kat. Saawe tau Maaron ighur sambam ve taan gha ilam aazne, patañani tauvene ivot pai eta soone. Ve murei paam, irau ivot muul mako. \*

<sup>20</sup> Isaav ighu Maaron inġoor saawe to patañani tana tuuku mako, ene aat tamtamon eta irau ileep mako. Tisov tilalez. Eemon i igham nġar pa yes tau i tauu isiigh zi timin le na. Tauta inġoor saawe tana imin tuuku wa.

<sup>21</sup> “Saawe tana, ighu tamtamon eta isaav payam ighu: ‘Aghita. Mesia tauta ene!’ ma isaav ighu: ‘I ileep izi sewe!’ na aghur ila saveñ tooni sov. \*

<sup>22</sup> Pasaa, zeran karomña pale tiburig, ve siriv titoom tighu yes Mesia. Ve siriv pale titoom tighu yes propet tau tivotia Maaron aliña. Ve yes pale tigham gabua nġeretazi tomania ilaal siriv tivot paam. Leso tigherev tamtamon gha tipul eez to Maaron. Yes tau Maaron isiigh zi timin i le na paam, isaav ighu zeran karomña tawe tirao, ene pale titoova to tigherev zi, lesu tipul eez to Maaron. \*

<sup>23</sup> “Aloñ. Gabua naol tane tivot soone, ve yau nasavi zi payam pataghañ. Tauvene matamim imomoos poi pa taumim.

*Muleej to Tamtamon Naatu*  
(Mt 24:29-31; Lu 21:25-28)

---

\* **13:19:** Dan 12:1; Yoel 2:2      \* **13:21:** 2Tes 2:1+      \* **13:22:** Lo 13:1+; 2Tes 2:9+; Syg 13:13

<sup>24</sup> “Isaav ighe patañani to saawe tana tivotiir le isov, ene pale aaz ighaaz muul mako, ve nugh ndoroom. Ve kaiyo paam, pale isul muul mako.

<sup>25</sup> Pitum to sambam saamba pale tipul niazi, ve titaptap tizi. Ve Maaron pale ivatoki gabua siriv to sambam saamba tau tapirizi tiina na le tirur.

<sup>26</sup> Mako tamtamon matazi izala le tighita Tamtamon Naatu ileep ila taitai loolo, ve izilam toman tapiri ve mbonari tiina kat. \*

<sup>27</sup> Ve i aat imbaañ anjela tooni tila tirau taan ziige paañ. Leso tiyauur yes tau i isiigh zi timin le na, ve tigham zi tila tooni. Pale tila pa ragh puughu, dau-dau puughu, yavaar puughu, ve kaagu puughu.”

*Saveen palelaañ to ai fik*

*(Mt 24:32-35; Lu 21:29-33)*

<sup>28</sup> Ra Yesu isaav pazi muul ighe: “Agham ngar pa ai fik. Ighe booga mbitai ve mbiila paghpaaghu tivot, na aghilaal aghe saawe to aaz ighe ilam tane.

<sup>29</sup> Gabua tau nasavi zi ne, ene ngara raraate mon. Isaav ighe aghita gabua naol tane tivotvot, mako awatagh aghe: Saawe to Tamtamon Naatu muleen tooni, ene ilam igharau wa, imin tamtamon tau iyooz ila ataman aavo. <sup>30</sup> Onoon kat, yau nasaav payam: Yes to saawe tane pale timaat soone, ve tighita gabua tana tisov tivotiir.

<sup>31</sup> Sambam saamba ve taan pale tilalez. Eemon saveen tsiau ziiri eta irau ilale ne mako.” \*

*Saawe duduun to Tamtamon Naatu muleen tooni, ene tamtamon eta iwataghi mako*

*(Mt 24:36-44; Lu 12:40)*

\* **13:26:** Dan 7:13; 1Tes 4:16+; Syg 1:7  
119:89; Mt 5:18

\* **13:31:** Mbo 102:25,

<sup>32</sup> Yesu isaav muul ighe: “Saawe duduun to Tamtamon Naatu muleen tooni, ene tamtamon eta iwataghi mako. Anela tau tileep sambam we tiwataghi mako, ve Naatu paam, iwataghi mako. Taama Maaron mon, ta iwataghi. \*

*Tamamaat ariaan ve tagham poghania uraat tau Maaron ighuru ila nimaan*

<sup>33</sup> “Tauvene matamim imomoos poi pa taumim ve amamaat ariaan. Pa saawe tana, yam awataghi mako. <sup>34</sup> Pale ivot imin neer ee tau ighe iburig gha ila pa nugh malau. Tauvene ighur uraat irau besoonja tooni, ve ipul ruum tomania gabua tooni siriv ila nimazi, lesu tingini. Ve isaav pa besoonja tooni tau ingin ataman na ighe ighur maata pani ve isanani. Ighur uraat pazi le isov, ra ipul zi, ve ila. \*

<sup>35</sup> “Tauvene yau nasaav payam. Amamaat ariaan. Pa saawe duduun to ruum taunja muleen tooni, ene yam awataghi mako. Pale ilam pa ravrave geeg, mbonj anoonja, nugh itun, ma mbonjoozo, ene yam awataghi mako. <sup>36</sup> Tauvene yam amamaat ariaan. Mako pale aghengheen, ve i ilat gha ipaperekin gham. <sup>37</sup> Tauvene saveen tau yau nasavia payam, ene ila pa tamtamon tison paam: Amamaat ariaan.”

## 14

*Yes daaba to Yuda tiil eez to tirav Yesu imaat (Mt 26:1-5; Lu 22:1-2; Yo 11:45-53)*

---

\* **13:32:** Mbanj 1:7; 1Tes 5:1+      \* **13:34:** Mt 25:14; Lu 12:35+

<sup>1</sup> Mboŋ ru isov, mako tizaa pa saawe to Pasova\* tomania lupuuŋ tiina to yes Yuda tau tilup zi pa sunjuuŋ ve tighan mberet tau le yis mako na. Yes daaba to watoonrau tomania yes ngara to tutuuŋ tigde tirav Yesu imaat. Tauvene tilup zi, ve tiil eez to tikisi imin yonŋaan. <sup>2</sup> Tisaav tigde: “Iit irau takisi pa saawe to lupuuŋ tiina tane mako. Pa ighe tagham tauvene, ene pale tareu eval tiina lolozi, ve tipaburigin malmal.” \*

*Livaa ee ilinŋ ngoreeŋ tau vaazi poia na izala Yesu daaba*

*(Mt 26:6-13; Yo 12:1-8)*

<sup>3</sup> Neer ee to nugh Betania, eeza Simon. I, muuŋ kolekole ighamu. Yesu tomania mbiwa tooni tila ruum tooni ve mbolezi izi pa ghanghaniinŋ, ve livaa ee igham ngoreeŋ paatu paghuuna ee tau ngoreeŋ igheen ila na, ve ilam. Ngoreeŋ tawe, vaazi poia, ve atuya tiina kat. Tigharaata pa gabua tau tiwaat eeza tigde ‘nard.’ I igham ngoreeŋ paatu tawe, ve iseeŋ polin aavo, † ra ilinŋ izala Yesu daaba.

<sup>4</sup> Tamtamon toozi siriv tighita ngar tau i ighamu na, le irau lolozi mako. Tauvene tiyau avozi pa livaa tana tigde: “Wai, i ivaghamunia ngoreeŋ tawe pasaa? <sup>5</sup> Gabua tawe, atuya tiina kat. Imin ta tagholia, kanaanŋ tagham maet tiina kat irau 300 denari ma vene, leso tauul yes mbolaanŋa pani!” Tauvene tiyaon livaa tana.

---

\* **14:1:** Pasova, ene lupuuŋ tiina to yes Yuda tau matazi inŋal imuul ila pa saawe tau timbuzŋa tileep saghat izi Isip, ve Maaron igham mulin zi ila yes Isipa nimazi. \* **14:2:** Mbo 2:1-3 † **14:3:** Ngoreeŋ paatu to livaa tane, ene aavo malaua. Tauta i iseeŋ polin aavo.

<sup>6</sup> Eemon Yesu isaav pazi ighe: “Ayau avomim pani pasaa? Apuli ileep. Ngar tau i igham payau, ene paghuuna. <sup>7</sup> Yes mbolaanja pale yamja alepleep irau saawe. Tauvene saawe sindei tau yam aghe auul zi, ene irau auul zi. Eemon yau, malau mako pale napul gham. Irau naleep tomani gham muul mako. <sup>8</sup> Ngar tau livaa tane irau igham payau, tauta ighamu wa. Ngoreen tau i ilinji izala pavog, ene imin i igharaat ghau pataghaan pa mateegh tsiau. \*

<sup>9</sup> Tauvene yau nasaav payam kat: Murei, tamtamon pale tila tivotia vaaru poia irau taan isov. Ve nugh sindei tau tivotia vaaru poia pazi, ene pale tisavia ngar tau livaa tane igham payau. Leso tamtamon matazi kisini.”

*Yudas isaav ighe i pale ighur Yesu ila koinja nimazi*

*(Mt 26:14-16; Lu 22:3-6)*

<sup>10</sup> Mbiwa to Yesu sanjavul ve ru, toozi ee, eeza Yudas Iskariot. Saawe tana, i ila to yes daaba to watoonrau, ve isaav pazi ighe i pale ighur Yesu ila nimazi. <sup>11</sup> Yes tiloon saveen tooni le lolozi poia kat, ve yesja timbu saveen tigde pale tigham le maet siriv. Timbu saveen le isov, ra Yudas ila ve isasanjan. Ighe saawe poia eta ivot, o ighur Yesu ila nimazi.

*Mbiwa to Yesu tila tigharaat aniinj to Pasova*

*(Mt 26:17-19; Lu 22:7-13)*

<sup>12</sup> Tilepleep le saawe imin maata to lupuunji tina to ghaniinj mberet tau le yis mako na ivot. Saawe tana, yes Yuda tiravrav sipsip natja pa

---

\* 14:8: Yo 19:40



ghanghaniin to Pasova. Tauvene mbiwa tooni tighason Yesu tige: “Yo ughe nila nigharaat aniin to Pasova payo izi sindei?” \*

<sup>13</sup> Tauvene Yesu imbaan mbiwa tooni ru tila, ve isaav pazi ighe: “Yamru alon ala nugh tiina Yerusalem, mako aghita neer ee ibaad uur to yaa, ve ilaagh narui gham ilat. <sup>14</sup> Matamim kisini ve ataghoni. Ruum sindei tau ighe i ilon ila, yamru ataghoni alon ala. Ve asaav pa ruum tauja aghe: ‘Padudujaan toit ighason ghom ighe: Ruum loolo tau yo ughuru pani na, igheen sindei? Pa i ighe yesja mbiwa tooni tilup zi ta sene pa ghanghaniin to Pasova.’

<sup>15</sup> Neer tana pale itotoi ruum loolo tiina ee payam. Igheen izala saaja. Nugh to lepooch ve ghanghaniin, ene gharatoon wa. Yamru agharaat leen aniin izi ta sewe.”

<sup>16</sup> Yesu isavsaav pazi le isov, ra mbiwa tooni tawe tiburig gha tilon tila Yerusalem, ve tighita gabua isov ivot itaghon Yesu aliija. Tauvene tigharaat aniin to Pasova izi ta sewe.

*Yesu tomania mbiwa tooni tighan aniin to Pasova*

*(Mt 26:20-25; Lu 22:14-23; Yo 13:21-30)*

<sup>17</sup> Ravrav izi, ve Yesu tomania mbiwa tooni sajavul ve ru tila tivot ruum tawe, ve mbolezi izi pa ghanghaniin to Pasova. <sup>18</sup> Yes tighanghan, ve Yesu isaav pazi ighe: “Yau nasaav payam kat. Yam tane, tsiam ee tau aazne ighanghan tomani ghau ne, pale ighur ghau nala koiagna nimazi.” \*

---

\* **14:12:** Igham 12:6+      \* **14:18:** Mbo 41:9

19 Mbiwa tooni tiloon saveen tane, le loloz ipatanan. Tauvene yes enaena tisaav pani tigne: “Wai, pale naghham ngar tauvene payo wa? Yau irau naghham tauvene mako.”

20 Yesu isaav pazi muul ighe: “Yam sanjavul ve ru tane, tsiam ee tau yeiru nizeev mberet izila rubruub eemon, ene i ta pale igham ngar tane.

21 Tauvene Tamtamon Naatu aat ila gha tiravu imaat itaghon saveena tau tiboode pataghaan wa. Ve neer tau pale ighuru ila koina nimazi na, ikaria tauu wa! Imin ta tiina ipoopa mako, kanan poia!”

*Yesu irei mberet ve vaen pa mbiwa tooni  
(Mt 26:26-30; Lu 22:17-20; 1Kor 11:23-25)*

22 Yes tighanghan, ve Yesu igham mberet ve ipait Maaron pani. Ra iteeva, ve ireii irau mbiwa tooni, ve isaav pazi ighe: “Aghamu. Ene yau mizag.” 23 Ra igham rubruub vaen, ipait Maaron pani, ve izuzuuna ila pazi, ve yes tisov tighun ila. Ve isaav pazi ighe: 24 “Ene yau sinjig tau pale imalin pa tamtamon katini. Leso ipariaan saveen mbuaan to eez paaghu tau pale Maaron ve tamtamon tivalupu zi timin eemon. \*

25 Yau nasaav payam kat: Yau aat naghun vaen muul mako, le irau saawe paaghu ivot ve itina talup ghiit muul izi sambam, o naghun.”

26 Tighanghan le isov, ve timbou mbou ee to tipakur Maaron, ra tivot tila muuri, ve tizala pa loloz Oliv. \*

*Yesu isaav ighe Petrus pale ipaisamuna  
(Mt 26:31-35; Lu 22:31-34; Yo 13:36-38)*

\* 14:24: Igham 24:8; 1Kor 10:16; Hib 8:8, 9:16+

\* 14:26: Mbo

<sup>27</sup> Yesu tomania mbiwa tooni tila tivot loloz Oliv, ra isaav pazi ighe: “Mbonj aazne, yam asov pale atap pa ghuruunj ila tsiam, ve aghur murimim payau. Pasaa, Maaron aliinja tau tiboode na, isaav tauvene:

‘Yau aat narav nginiinj to sipsip  
ve sipsip tiparghaughau.’ \*

<sup>28</sup> “Eemon murei, saawe tau Tamañ Maaron ipaburigin ghau pa mateegh, yau aat namuun nala nasaan gham izi Galilaia.”

<sup>29</sup> Petrus iloonj saveenj tane, ve isaav ariaanj pa Yesu ighe: “Ene aat yes siriv. Ve yau irau natap ve naghur murig payo ne mako.”

<sup>30</sup> Yesu isaav pani ighe: “Aa Petrus, yau nasaav payo kat. Mbonj aazne, yo aat upaisamun ezag pai tol le isov, o tatareek itanj muul imin pai ru.”

<sup>31</sup> Tauvene Petrus isaav ariaanj muul ighe: “Sei isaav! Isaav ighe tirav ghau namaat tomani ghom, ene poia. Tirav ghau lak! Eemon irau napaisamun yo ezam mako.” Ve mbiwa tooni tisov tisavia saveenj raraate mon.

*Yesu isunj izi Getsemane*  
(Mt 26:36-46; Lu 22:39-46)

<sup>32</sup> Ra Yesu igham mbiwa tooni gha yesnja tilaagh tila tivot nugh ee, eeza Getsemane. Tila tivot ta sewe, ve i isaav pazi ighe: “Mbolemim izi ta sene, ve yau nala nasunj izi sewe.” <sup>33</sup> Ra igham Petrus, Yakobus, ve Yoan gha yesnja tila soghan rig. Saawe tana, Yesu loolo ipatanjan le ipatanjan kat, ve igham ngar naol pa patanjani tau pale ivot pani.

<sup>34</sup> Tauvene isaav pazi ighe: “Oyai, lolog ipatanjan

---

\* **14:27:** Sek 13:7; Yo 16:32

kat le rigmon kanan namaat. Yam aleep izi ta sene ve amamaat ariaan.” \*

<sup>35</sup> Ra ilaagh ila rig, itap izi taan, ve ighason Maaron ighe irau to ipasalia patañani tana pani, ma mako? Pasaa, Yesu iwatagh: Saawe to patañani izaan tooni, tauta ivot wa. <sup>36</sup> Ve isaav ighe: “Abba, † Tamañ, gabua eta ikeek ghom mako. Yau naghe upasalia rubruub § tane payau. Eemon utaghon ngar tsiau sov. Utaghon taum lolom.”

<sup>37</sup> Isuñ le isov, ra imuul ila to mbiwa tooni tol tana, ve ighit zi tighengheen. Tauvene isaav pa Petrus ighe: “Simon, yo ugheen? Mindai, irau umamaat rigta mako? <sup>38</sup> Yam amamaat ariaan ve asuñ. Mako pale tovaan ivot payam, ve rekia mon atap ve apul ghuruun ila tsiam. Onoon, loloon taghe le tataghon Maaron ngar tooni. Eemon ngar to uliin iyaryaan ila loloon, tauta igham ghiit tapiriin imbool.” \*

<sup>39</sup> Yesu isavsav pazi le isov, ra ipul zi, ve ila isuñ muul itaghon sunuun tau papazoge ighamu na. <sup>40</sup> Isuñ le isov, ra imuul ila to mbiwa tooni, ve ighit zi tighengheen soone. Pasaa, matazi irav zi kat pa ghenoon. Tauvene matazi ingal saveen eta to tisavia pani ne mako. <sup>41</sup> Yesu ila isuñ muul imin pai tol, ra imuul ila, ve isaav pazi ighe: “Wai,

---

\* **14:34:** Yo 12:27 † **14:36:** ‘Abba’, ene yes Israela alinazi ziiri ee. Yes Israela natuzña geegeu tipoipoi tamazña tigue: ‘Abba’, imin iit natuunña tipoipoi tamazña tigue ‘Ama’. § **14:36:** Rubruub tau Yesu isavia, ene izaan to patañani tau i pale ibaado, lesu ireu sosor to tamtamon ve itatan Maaron aatyavyav tooni. \* **14:38:** Ro 7:23; Ga 5:17

yam aghengheen soone? Irao lak! Ene saawe to auul tinimim mako. Pa saawe to tighur Tamtamon Naatu ila zeran sasaghati nimazi, tauta ivot wa. <sup>42</sup> Aburig gha tala. Aghita. Neer tau ighe ighur ghau nala koiagna nimazi, tauta ilam peria wa!”

*Tikis Yesu*

*(Mt 26:47-56; Lu 22:47-53; Yo 18:3-12)*

<sup>43</sup> Yesu isavsaav soone, ve Yudas igherev eval tiina gha tilam peria. (Mbiwa sanjavul ve ru, i toozi ee.) Eval tiina tawe, yes daaba to watoonrau tomania yes ngara to tutuun ve pooza siriv to yes Yuda timbaan zi. Yes tikis mbuzaagh ma zaab le irau zi. <sup>44</sup> Yudas igharaat saveen pazi pataghaan ighe: “Tala peria ve ighe aghita nasaghav neer eta ve nayanin pani, ene i tauu. Akisi, zaaba tingin poghania, ve aghamu ala. Yau aat naghur ilaal tauvene payam, lesu aghilaal neer tawe.”

<sup>45</sup> Tauvene saawe tau tila tivot toozi, Yudas rekia mon inarui Yesu ila, ve isaav pani ighe: “Aa Padudunaa!” ve isaghavu ve iyanin pani. <sup>46</sup> Ra eval tiina tana tikis Yesu. <sup>47</sup> Tauvene yes tau tiyooz tomania Yesu na, toozi ee ipas mbuzaagh tooni iza, ve isiki le isap motin neer ee taliina. Neer tawe, i daaba to watoonrau besoonja tooni.

<sup>48</sup> Ra Yesu isaav pa eval tiina tana ighe: “Mindai ta alaagh toman mbuzaagh ma zaab, ve alam pa kisiin ghau? Yau neer to ghamuun malmal?

<sup>49</sup> Saawe naol, itina talepleep izi Rumei Tiina naagho, ve napaghazonai gham pa Maaron aliina. Puughu mindai ta akis ghau pataghaan ta sewe mako? Poia. Akis ghau lak. Lesu Maaron aliina tau tiboode pataghaan na ighur anoonja.”

<sup>50</sup> Yesu isavia saveeŋ tane, ve mbiwa tooni tisov tipuli, ve tighawaar. \*

<sup>51</sup> Neer paaghu ee itaghon Yesu gha yesŋa tila tivot nugh tawe. I ikawaal uuli mon. Yes zaaba tigde tikisi paam. <sup>52</sup> Eemon tigham sapirini, ve tikis uuli tooni mon. Tauvene kambaŋmbaŋi, ve ilaan ighau gha ila. \*

*Tipayooz Yesu ila daaba to yes Yuda naghozi  
(Mt 26:57-68; Lu 22:54-55, 63-71; Yo 18:13-14, 19-24)*

<sup>53</sup> Yes tigham Yesu tila, ve tighuru ilonŋ ila ruum to daaba tau imuunŋ pa yes to watoonrau. Daaba tisov to watoonrau, tomania yes ŋgara to tutuunŋ ve yes pooza tilup zi ta sewe ve tisaŋaŋ. <sup>54</sup> Petrus ipaspas ghi poipoi, ve itaghon Yesu gha ila. Eemon ilaagh malau rig, pasaa iroi. Tauvene vene le ila peria sirsiir to ruum tawe. Ra ilonŋ ila sirsiir loolo, ve mboole izi tomania uraata siriv to daaba to watoonrau ila yav ziige, ve yav ilavlaavo.

<sup>55</sup> Yes daaba to watoonrau tomania tamtamon tisov to lupuunŋ tiina tau tiŋginŋin yes Yuda na, titoova to tiil tamtamon siriv to tipariaaŋ saveeŋ tigde yes tighita Yesu igham sosor. Leso imin puughu pani to tiravu imaat. Eemon ŋgar toozi ighur mako. <sup>56</sup> Onoon, tamtamon katini tipariaaŋ saveeŋ karom tigde yes tighita Yesu igham sosor. Eemon saveeŋ toozi raraate mako. Tisavia saveeŋ maata ite ite. \*

---

\* **14:50:** Mbo 88:8; Mk 14:27      \* **14:52:** Zeran ŋgara siriv tigde neer paaghu tau ighau ila, ene Markus tau ibood vaaru poia tane.

\* **14:56:** Igham 20:16; Lo 19:15

<sup>57</sup> Ra zeran siriv tiburig, ve tingal saveeņ pani tigde: <sup>58</sup> “Yei nilooņ ņeer tane isaav ighe: ‘Rumei Tiina tau tamtamon tirao pa nimazi na, yau aat nareua izi, ve napayooz rumei ite pa mboņ tol mon. Rumei tana, tamtamon pale tirao pa nimazi mako.’ ” \*

<sup>59</sup> Eemon yes paam, aliņazi raraate mako. Saveeņ toozi maata ite ite.

<sup>60</sup> Tauvene daaba to watoonrau iburig iyooz ila yes pooza tawe naghozi, ve isaav pa Yesu ighe: “Ulooņ wa? Yes tipariaaņ saveeņ tigde tilooņ ghom usavia saveeņ tauvene. Mindai, irau uyol saveeņ toozi, ma mako?” <sup>61</sup> Eemon Yesu iyol saveeņ eta mako. Ineneeņ mon. Tauvene daaba to watoonrau ighasoni muul ighe: “Usaav ghazooņa payei lak. Yo Mesia? Maaron tau tamtamon tipapaiti pa poia tooni na, Naatu yo?” \*

<sup>62</sup> Yesu iyol aliņa ighe: “Vee! Taug tane. Ve murei, yam pale aghita:

‘Tamtamon Naatu ileep ila niia to ghamuun pooz tau igheen ila Maaron saksaki niima tapir. Ve i pale ileep ila taitai to sambam, ve imuul izilam.’ ” \*

<sup>63</sup> Daaba to watoonrau ilooņ saveeņ tana le ireu loolo. Tauvene iraaņat nonoghiņa tooni, ve isaav ighe: “Isov wa! Tail tamtamon ite paam to ipariaaņ saveeņ muul pasaa?” <sup>64</sup> Aazne, yam taumim alooņ katin saveeņ ila i tauu aavo wa. I isavia saveeņ veleghiņ pa Maaron. Laak, yam agham ņgar pani mindai?”

---

\* **14:58:** Yo 2:19; Mbaņ 6:14    \* **14:61:** Is 53:7    \* **14:62:** Mbo 110:1; Dan 7:13; Syg 1:7

Yes tisov tilup avozi, ve tisaav tigde: “I isosor wa. Tamtamon tauvene irau ileep mako. I aat imaat.” \*

<sup>65</sup> Ra tamtamon toozi siriv tiburig gha tinazuvu, tikau maata, tiravu, ve tipañizaini tigde: “Yo propet, ne? Na uvotia Maaron aliina payei!” Ra yes uraata siriv to Rumei Tiina anazi tighamun, ve tiposai naagho paam.

*Petrus ipaisamun Yesu eeza*

*(Mt 26:69-75; Lu 22:56-62; Yo 18:15-18, 25-27)*

<sup>66-67</sup> Saawe tau yes daaba tiloon saveen to Yesu, Petrus ilepleep igharau yav tau tindavu ila sirsiir loolo na, ve yav ilavlaavo. Livaa paaghu ee tau ibesbees pa daaba to watoonrau na ilam ve itugh maata pa Petrus, ve isaav ighe: “Ai, yo tane, ulaghlaagh tomania Yesu to Nasaret paam.”

<sup>68</sup> Eemon Petrus ipaisamun tauu ighe: “Wai, saveen tau yo usavia ne, yau nawataghi mako. Nakankaan pani.” Ra ipul niia tawe, ve izuur ivot igharau sirsiir aavo. Saawe tana, tatareek itan. <sup>69</sup> Besoona livaa tawe maata ila le ighita Petrus muul. Tauvene isaav pa yes tau tiyozooz tigharau na ighe: “Ai, aghita! Neer tane, i toozi ee paam.” <sup>70</sup> Eemon Petrus ipaisamun tauu muul.

Tilepleep rig, ra yes tau tiyooz tigharau Petrus na, anazi tisaav pani tigde: “Onoon kat. Yo tane, toozi ee paam. Pasaa, yo to Galilaia.”

<sup>71</sup> Tauvene Petrus iburig, ve aavo iyaryaan kat ighe: “Onoon sambam, neer tau yam asasavia na, yau nawataghi rigta mako kat. Ighe natoon, Maaron tauu pale ivaghamun ghau!” <sup>72</sup> Saawe

\* **14:64:** Wkp 24:16; Yo 19:7



duduun tana, tatareek itan muul imin pai ru. Tauvene Petrus maata ingal Yesu aliina tau ighe: “Mbon aazne, yo aat upaisamun ezag pai tol, o tatareek itan muul imin pai ru.” Tauvene Petrus loolo isaghat kat, ve itan tiina.

## 15

*Tipayooz Yesu pa savaaveen ila Piladus naagho  
(Mt 27:1-2, 11-14; Lu 23:1-5; Yo 18:28-38)*

<sup>1</sup> Mbonoozo geeg, yes daaba to watoonrau tomania ngara to tutuun, ve daaba siriv to lupuun tiina tau tinginngin yes Yuda na, tisov tilup zi, ve tivasavo zi pa saa ngar ta pale tigham pa Yesu. Le isov, ra tikis Yesu, tikau niima, ve tighamu tila tighuru ila Piladus niima. <sup>2</sup> Piladus ighason Yesu ighe: “Mindai, yo tane kinik to yes Yuda?”

Yesu iyol aliina ighe: “Saveen tauta taum usavia na.” \*

<sup>3</sup> Ra yes daaba to watoonrau tiburig, ve tingal saveen naol pa Yesu. <sup>4</sup> Tauvene Piladus ighasoni muul ighe: “Mindai, yo irau uyol saveen toozi, ma mako? Ughita. Yes tingal saveen naol payo.”

<sup>5</sup> Eemon Yesu isavia saveen eta muul mako. Ineenen mon. Tauvene Piladus igham ngar naol. \*

*Piladus iyok ighe tirav Yesu izala ai pambaroon  
(Mt 27:15-26; Lu 23:13-25; Yo 18:39-19:16)*

<sup>6</sup> Ndaman ta naol ne, lupuun tiina to Pasova ighe ivot, ene Piladus ighamgham tauvene: Yes tau tileep ila ruum to yavyavuun loolo, isaav ighe eval tiina tighasoni to ipul toozi eta ivot, ene i aat ipuli ivot. <sup>7</sup> Saawe tana, neer ee, eeza Barabas, yesna

\* 15:2: Yo 18:36-37 \* 15:5: Is 53:7

zeran siriv paam tileep ila ruum to yavyavuun loolo. Pasaa, saawe tau eval tiina tipaburigin malmal to tiziir gavman to Rom, Barabas tomania zeetŋa tawe tirav tamtamom siriv timaat.

<sup>8</sup> Tauvene eval tiina tila to Piladus, ve tighasoni tigha ipul tamtamom toozi eta ivot itaghon ŋgar tau monmon ighamghamu na. <sup>9</sup> Piladus iyol aliŋazi ighe: “Mindai? Yam aghe yau napul kinik to yam Yuda ilat payam?” <sup>10</sup> Piladus isaav tauvene pasaa, i iwatagh: Daaba to yes Yuda tigham Yesu ilam, ve tighuru ila niima pasaa, tighita tamtamom katini tipaiti pa uraat tooni ve titaghoŋi. Tauta ireu yes daaba tawe lolozi ve tighur koi pani.

<sup>11</sup> Emon yes daaba to watoonrau tipazaagh eval tiina, lesu tiyok pa Piladus aliŋa sov, ve tighasoni to ipul Barabas ivot ila. \*

<sup>12</sup> Tauvene Piladus ighason zi muul: “Igha tauvene, pale naghama mindai pa ŋeer tau yam awaato aghe i kinik to yam Yuda?”

<sup>13</sup> Yes tiboob muul toman aliŋazi tiina tigha: “Uravu izala ai pambaroon!”

<sup>14</sup> Tauvene Piladus ighason zi muul ighe: “Pasaa? I ighama saa sosor?”

Emon tinoknok bobaaŋ tigha: “Uravu izala ai pambaroon!”

<sup>15</sup> Piladus ighe ighama eval tiina tawe lolozi poia. Tauvene iloon aliŋazi, ve ipul Barabas ivot ila toozi. Ve isaav gha tilos Yesu. \*

---

\* **15:11:** Mbaŋ 3:13+      \* **15:15:** Ravraav tau Roma tiloslos tamtamom pani na, timbit gabua matazi ila, lesu iranŋat tamtamom ulizi ve mizazi.

Ra ighuru ila zaaba tooni siriv nimazi. Leso tighamu tila ve tiravu izala ai pambaroonj.

*Yes zaaba tipamogherai Yesu ve tilosi  
(Mt 27:27-31; Yo 19:2-3)*

<sup>16</sup> Yes zaaba tawe tigham Yesu gha tilonj tila gavana ruum tooni loolo, ra tipoi zetazna tISOV tilam tilup zi, ve tipamogherai Yesu imin i kinik. <sup>17-18</sup> Tigham uuli ee tau ngereeta imin aindan, ve tisiki izala Yesu avaara. Ve tigham waar tu-atua gha titalia, ve tighuru izala Yesu daaba imin moghar ndamoonda. Ra tisaav pani tigde: “Iya, aa kinik to yes Yuda, yei nipakur ghom!” <sup>19</sup> Ve tigham toon gha tiloslos daaba pani, tinazuvu, ve tiput aghezi pani imin pakuruunni. <sup>20</sup> Tipaninjizaini le isov, ra tizuzuum uuli tau ngereeta imin aindan na izi pani, ve tinonoghi pa tauu uuli tooni muul, ve tighamu tila, lesO tiravu izala ai pambaroonj.

*Tirav Yesu izala ai pambaroonj  
(Mt 27:32-44; Lu 23:26-43; Yo 19:17-27)*

<sup>21-22</sup> Yes tipul nugh tiina Yerusalem, ve tilaagh taghon eez tila, le tizaa to neer ee to nugh Sairini, eeza Simon. I Aleksander ve Rupus tamazi. I ileep Yerusalem ziige, ve ighe ilonj ila pa nugh tiina. Yes zaaba tighita, ve tikisi ve tighur ai pambaroonj to Yesu izala avaara gha aana ibaado, ve tila tivot nugh ee, eeza ‘Golgata.’ (‘Golgata’ puughu tau-vene: Nugh tau ghitoonja imin tamtamon daaba rubruuba.) <sup>23</sup> Zaaba tana tigde tigham Yesu le vaen tau titoora tomania marasin, lesO iuule pa yavyavuunj tooni. Eemon i loolo pa ghunuunni mako. <sup>24</sup> Yes tiravu izala ai pambaroonj, ra tigham Yesu nonoghiinja tooni tomania gabua tooni siriv,

ve tigde tirei zi irau zi. Tauvene tipayooz mbuur, leso itotoi sei tau pale igham saa gabua. \*

<sup>25</sup> Saawe tau tirav Yesu izala ai pambaroon, aaz anunu igham liim ve paan. <sup>26</sup> Tibood paesiin to mateegh tooni puughu izala ai pambaroon tooni daaba. Paesiin tawe isaav ighe: ‘Kinik to yes Yuda.’ <sup>27-28</sup> Saawe tau tirav Yesu izala ai pambaroon, tirav tamtamon ru paam. Ee, tipayooze ila pa Yesu niima tapir, ve ite ila pa nas. Yesuru zeran to taliinjizi ve ghamuun malmal. † \*

<sup>29</sup> Saawe tau Yesu ituktuuk ila ai pambaroon, eval tiina tilala tilamlam. Ve titurun luazi imin veleghiin, ve tisiksik saveen veleghiin pani tigde: “Aa, ughita wa! Yo ta ughere ureu Rumei Tiina izi, ve mbon imin tol, o upayooze muul. <sup>30</sup> Poia. Uul taum ve uzi pa ai pambaroon tsio!” \*

<sup>31</sup> Yes daaba to watoonrau tomania ngara to tuuun tivelghi paam. Tivasavo zi tigde: “I iuluul tamtamon naol, eemon irau iuul tauu mako. <sup>32</sup> I ighe i Mesia ve kinik to iit Israela. Poia. Taleep ve taghita. Ighe ipul ai pambaroon tooni gha izilam taan, o taghur ila tooni!” Zeran ru tau tirav zi izala ai pambaroon igharau Yesu na, yesuru paam tisiksik saveen veleghiin pani.

### *Yesu imaat*

*(Mt 27:45-56; Lu 23:44-49; Yo 19:28-30)*

---

\* **15:24:** Mbo 22:18 † **15:27-28:** Yes Roma tirav tamtamon ila ai pambaroon pa sosor sorok mako. Yes tau sasaghatizi kat, ve yes tau tigham malmal to tiziir gavman to Rom na, yes mon ta gavman to Roma tirav zi ila ai pambaroon. \* **15:27-28:** Is 53:12 \* **15:30:** Mbo 22:7, 109:25; Yo 2:19

<sup>33</sup> Aaz anunu izalam zegmatuugh, ra ndoroom tiina ivot irau taan isov, ve ighengheen tauvene le aaz ivool (3 kilok). <sup>34</sup> Ra Yesu iboob aliija tiina ighe: “Eloi, Eloi lema sabaktani!” Saveej tane, puughu tauvene:

‘Maaron tsiau, Maaron tsiau! Puughu mindai ta ughur murim payau?’ \*

<sup>35</sup> Tamtamon siriv tau tiyozyooz tigharau Yesu na, tiloon sapirin saveej tane, ve tisaav tigde: “Aloon! Ipoi propet Ilia.” † <sup>36</sup> Tauvene tamtamon toozi ee ilaan ila igham spans, ve izeeva izila uur ee tau vaen igheen ila. Ra ikauu ila ai malaua ee, ve izuzuuna izala pa Yesu, leso igholooma. Ve isaav ighe: “Aleep ve taghita. Pale Ilia ilam iuule ve ighamu izi, ma mako?” \*

<sup>37</sup> Ra Yesu iboob muul toman aliija tiina, ve iyav- aghan gha imaat.

<sup>38</sup> Saawe duduun tana, uuli tiina tau ituuk ila Rumei Tiina loolo ve iponpoon nugh tau patabuyaan kat na, imarangat ta saanja we, ve malmali izila siija, le imin ru. \*

<sup>39</sup> Daaba to yes zaaba iyozyooz ila Yesu naagho, ve ighita Yesu imaat. I ighita mateegh tooni, ite kat. Tauvene isaav ighe: “Onoon kat, neer tane, i Maaron Naatu.” \*

<sup>40</sup> Zilivaa siriv tiyozyooz soghan, ve timamarar gabua tau ivotvot na. Zilivaa tawe, toozi tol, ene Maria to nugh Magdala, ve Maria ite tau Yakobus

---

\* **15:34:** Mbo 22:1 † **15:35:** Yes Israela tiwaat propet Ilia eeza tigde ‘Eliyahu.’ Tauta saawe tau Yesu ipoi Maaron ighe “Eloi, Eloi”, tamtamon tigde pa i ipoi Ilia. \* **15:36:** Mbo 69:21 \* **15:38:** Igham 40:21; Hib 6:19, 10:19+ \* **15:39:** Mk 1:24

marani ve Yosep tinazi na, ve Salome. <sup>41</sup> Saawe tau Yesu ighamgham uraat izi Galilaia, zilivaa tana titaghoni ve tibesbees pani. Ve zilivaa naol tau yesṅa Yesu tilaagh tila pa Yerusalem na, yes paam tileep tomani zi.

*Tighur Yesu paata ila naal loolo*  
(Mt 27:57-61; Lu 23:50-56; Yo 19:38-42)

<sup>42</sup> Saawe tana, ene saawe to titartar pa umbom patabuyaṅ tau ighe ivot. Ve ravrav izi wa. <sup>43</sup> Tauvene ṅeer ee to nugh Arimatea, eeza Yosep, ipariaṅ ghi ve ila to Piladus gha ighasoni ighe iyokia Yesu paata pani. Yosep, i ṅeer ee tau eval tiina titandagh pani, ve tipapait eeza. I ileep ila lupuṅ tiina to yes daaba tau tiṅinṅin yes Israela. Ve ighurghur maata pa saawe to Maaron itotoi pooz tooni ivot ighazooṅ.

<sup>44</sup> Saawe tau Yosep ipaes pa Piladus ighe Yesu imaat wa, Piladus igham ṅgar naol ighe: “Yesu imaat onoon, ma mako?” Tauvene ipoi daaba to yes zaaba tau tirav Yesu izala ai pambarooṅ na ilam, ve ighasoni ighe: “Yesu imaat kusia wa, ma soone?” <sup>45</sup> Daaba tawe ipaes pani ighe Yesu imaat wa. Tauvene Piladus iyokia Yesu paata pa Yosep.

<sup>46</sup> Yosep ighol uuli pisolooṅ ee, ve ighamu ila. Ve yesṅa zeran siriv tizugh Yesu paata izi pa ai pambarooṅ, ve tizunua pa uuli tawe. Ra tighamu tila, ve tighuru ilon ila maet puura ee tau tigharaata pataghaṅ imin naal pa mateegha. Ve tipatambulia maet tiina ee ila ipoon puura aavo. <sup>47</sup> Maria to Magdala yesuru Maria ite tau Yose tiina na tileep tomani zi paam. Tauvene yesuru tila tighita nugh tau tighur Yesu paata pani na.

# 16

## *Yesu iburig pa mateegh*

*(Mt 28:1-8; Lu 24:1-12; Yo 20:1-10)*

<sup>1</sup> Umbom patabuyaanj isov, ra Maria to Magdala yesuru Maria ite tau Yakobus tiina, ve Salome, yes tol tila tighol naunaun tomania ngoreen tau vaazi popoia na, tigha tighamu tila, ve tilinj izala Yesu paata. <sup>2</sup> Tauvene saawe imin maata to wik tana, mbonoozo tau aaz ighe iza, ve yes tol tiburig gha tila pa naal to Yesu. <sup>3</sup> Tilaghlaagh tila, ve tivasavo zi tigha: “Sei pale iuul ghiit, ve ipatambulia maet tiina ighau pa naal aavo?” <sup>4</sup> Tila tivot, ve matazi ila le tighita maet tiina tau ipoon naal aavo na igheen ila niia muul mako. Tipatambulia ighau ila ziige wa. <sup>5</sup> Tauvene zilivaa tawe tilon tila naal loolo, le tighita neer paaghu ee mboole izi ziige ila pa tapir. I inonogh ghi pa nonoghiinja pisisoonja. Yes tighita, le tirur ve ngar toozi imbool.

<sup>6</sup> Neer tawe isaav pazi ighe: “Yam agham ngar naol sov. Yau nawatagh: Yam alam aghe aghita Yesu to Nasaret tau tiravu izala ai pambaroon na paata. Eemon i ileep ta sene muul mako. Maaron ipaburigini pa mateegh wa! Aghita niia tau tighur paata igheen ila ne. <sup>7</sup> Aloon. Yam ala ve apaesia gabua tane vaaru pa mbiwa tooni. Ve matamim injal Petrus, ve apaes pani paam. Asaav pazi aghe: Yesu pale imuun ila Galilaia. Ataghoni ala, o aghita izi ta sewe itaghon saveen tau muun i isavia payam.”

<sup>8</sup> I isavsaav pazi le isov, ra zilivaa tana tipul naal, ve tivot tila muuri, ve tighau tila toman roinj tiina. Pasaa, gabua tau ivot pazi na, igham zi tirur le ngar

toozi imbool. Tauvene tisavia gabua tana vaaru pa tamtamon eta mako. \*

*Maria to Magdala ighita Yesu*  
(Mt 28:9-10; Yo 20:11-18)

<sup>9</sup> Saawe imin maata to wik tana (Sande), mbonoozo geeg, ve Yesu iburig pa mateegh. Ra ila ivot to Maria to Magdala imin maata. I livaa tau muun Yesu iziir avuvu sasaghati liim ve ru tighau pani. \*

<sup>10</sup> Maria ighita le isov, ra ila ipaes pa yes tau muun tilaghlaagh tomania Yesu na. Pasaa, yes tileep toman lolozi ipatanan ve titanjan pani. <sup>11</sup> I isaav pazi ighi: “Yesu, i iburig pa mateegh, ve ileep maata yaryaare. Yau naghita pa taug matag.” Eemon yes tighur ila saveen tooni mako.

*Mbiwa ru tighita Yesu izi eeze*  
(Lu 24:13-35)

<sup>12</sup> Murei ra, mbiwa ru to Yesu tipul nugh tiina Yerusalem, ve tilaghlaagh taghon eez tila, ve Yesu ivot toozi. Eemon tighilaalo rekia mako. Pasaa,

---

\* **16:8:** Zeran ngara katini tighi saveen tau Markus tauu iboode na, ilam imuul ves 8 mon. Eemon murei, tiseen vaaru poia to Markus pa saveen siriv itaghon saveen tau Matayu ve Lukas tiboode na. Saveen tawe ta aazne ighen ila ziiri 9 ila imuul ziiri 20. Ve buk munganazi siriv, saveen ziiri ite ipasov vaaru poia to Markus. Saveen tauvene: “Zilivaa tana timuul tila, ve tipaesia saveen isov tau anela isavia pazi na pa Petrus tomania yes tau tileep tomania na. Murei ra, Yesu imbaan mbiwa tooni tila to tivotia saveen patabuyaaj to Maaron pa nughmarin. Yes tau tileep ila pa aaz iza, ve yes tau tileep ila pa aaz izila na paam. Leso tiwatagh eez to Maaron igham mulin zi, ve tileep matazi yaryaare le alok. Saveen tooni tana irau isov ne mako. Ighen le alok.” \* **16:9:** Lu 8:2



naagho ite rig. <sup>13</sup> Saawe tau tighilaalo, timuul tila ve tipaesia gabua tana vaaru pa mbiwa tooni siriv. Eemon saveenj toozi paam, zetazña tighur ila mako.

*Yesu ivot to mbiwa tooni*  
(Yo 20:26-31)

<sup>14</sup> Murei ra, mbiwa tooni sanjavul ve ee tilup zi pa ghanghaniinj ve tilepleep. Malau mako ve Yesu tauu ivot toozi, ve iyaon zi. Pasaa, i iburig pa mateegh, ve tamtamon siriv tighita, ve tisavia vaaru pazi wa. Eemon ngar toozi iyaryaanj, ve tighur ila mako. \*

*Yesu ighur uraat pa mbiwa tooni*  
(Mt 28:18-20; Lu 24:44-49; Mbanj 1:6-8)

<sup>15</sup> Ve Yesu isaav pazi ighes: “Ala arau nughmarinj, ve avotia vaaru poia pa tamtamon tisov to taan. \*

<sup>16</sup> Isaav ighes tamtamon eta ighur ilam tsiau, ve igham yaa, ene aat Maaron igham mulini ve ileep poi. Eemon yes tau tighur ila mako, Maaron pale ighur atuya pazi ve tilalez. \*

<sup>17</sup> Yes tau tighur ilam tsiau, ene pale naghama lezi tapiri to tighama gabua ngeretazi tivot. Gabua tauvene: Pale tiziir avuvu sasaghata tighau ila yau ezag, ve tisavsaav ila nugh nugh alinjazi tau tiwataghi mako. \*

<sup>18</sup> Ve isaav ighes tikis moot saghati eta, ma tighun kaut lilia eta, ene aat irau ivaghamaun zi mako. Ve isaav ighes tighur nimazi izala moroghoonja

---

\* **16:14:** 1Kor 15:5+      \* **16:15:** Mt 28:19; Mbanj 1:8; Kol 1:23

\* **16:16:** Yo 3:18, 36; Mbanj 2:38; Ro 10:9      \* **16:17:** Mbanj 2:6, 5:16, 8:7, 10:46; 1Kor 12:9, 28

pavozi, ve tighason Maaron to iuul zi, i aat igham zi tinizi poia muul.” \*

*Yesu imuul izala pa sambam  
(Lu 24:50-53; Mbanj 1:9-11)*

<sup>19</sup> Tiina toit Yesu isavsaav pa mbiwa tooni le isov, ra Taama Maaron ighamu imuul izala pa sambam, ve mboole izi ila i niima tapir. \*

<sup>20</sup> Ra mbiwa tooni tila tivotia vaaru poia irau nugh naol isov. Ve Tiina toit ileep tomani zi pa uraat toozi, ve igham gabua ngeretazi ivot ila nimazi. Tauta ipariaan saveen tau tivotia na, ve tamtamon tighur ila tighe saveen tana, ene saveen onoon. \*

---

\* **16:18:** Lu 10:19; Mbanj 3:7, 28:3+; Yems 5:14+      \* **16:19:** Mbo 110:1; Mbanj 2:33, 7:55; Ro 8:34; Hib 1:3      \* **16:20:** Mbanj 4:29, 14:3; Hib 2:3

**Maaron Saveen Tooni Patabuyaang  
The New Testament and portions of the Old Testament  
in the Tuam dialect of the Saveeng language of Papua  
New Guinea. The Saveeng language is also called the  
Mutu language.  
Sampela hap Buk Baibel long tokples Saveeng Tuam  
long Niugini.**

copyright © 2011 Wycliffe Bible Translators, Inc.

Language: Saveeng (Mutu)

Dialect: Tuam

Translation by: Wycliffe Bible Translators

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2017-08-31

---

PDF generated using Haiola and XeLaTeX on 11 Nov 2022 from source files dated 9 Oct 2020

adb844f0-d769-5b05-9dd0-7c01fca938bb